



天



率速秘書



小字印




序

余少有詩癖歲在甲午奉

祠湖曲日與四方勝游專

意吟事大槩與唐人詩誦

之尤習間又褻話錄之纂



全唐詩話  
記益朋友之見聞彙而書  
之名曰全唐詩話未幾驅  
馳于外此事便廢邇來三  
十有八年矣今又蒙恩便  
養湖曲因理故篋復得是

編披覽慨然恍如疇昔浩  
歌縱談時也唐自貞觀來  
雖尙有六朝聲病而氣韻  
雄深駸駸古意開元元和  
之盛遂可追配風雅迨會

昌而後刻露華靡盡矣往  
往觀世變者於此有感焉  
徒詩云乎哉咸淳辛未重  
陽日遂初堂書

全唐詩話目錄

卷一

太宗

中宗

德宗

宣宗

武后

上官昭容

高宗

玄宗

文宗

昭宗

徐賢妃

孔紹安

虞世南

魏徵

李百藥

長孫無忌

王勃

馬周

李義府

杜淹

蘇味道

駱賓王

陳子昂

李日知

李景伯

崔融

李適

徐彥伯

李嶠

蘇頲

沈佺期

李行言

張元一

劉希夷

張敬忠

張說

宋璟

王灣

姚崇

趙仁獎

金昌緒

張九齡

王維

王縉

賀知章

李嘉祐

張均

王諲

孟浩然

陶峴

王昌齡

李清

韓滉

王之渙

卷二

劉長卿

章八元

韋應物

朱放

李泌

暢當

皇甫冉

皇甫曾

秦系

顧況

朱絳

楊志堅

劉方平

戎昱

柳郴

薛昇

元載

楊郇伯

梁銍

戴叔倫



于鵠

李益

耿偉

盧綸

韓翃

錢起

司空曙

崔峒

李端

冷朝陽

竇叔向

竇常

竇鞏

常建

李約

陳通方

楊炎

裴度

韓愈

張籍

李道昌

陸暢

李翱

劉義

楊巨源

歐陽詹

袁高

閻濟美

裴交泰

劉竈

元稹

白居易

卷三

牛僧孺

李紳

劉禹錫

陳潤

賈島

李正封

崔護

張又新

柳公權

陸鴻漸

章孝標

施肩吾

孟簡

張肅遠

許康佐

張南史

徐凝

令狐楚

張仲素

郎士元

于良史

舒元興

李賀

柳宗元

邵真

李宣遠

王建

朱灣

蘇郁

韋丹

王播

周匡物

劉言史

劉猛

李餘

李涉

劉昭禹

孫昌胤

嚴休復

朱慶餘

楊虞卿

楊汝士

張志和

嚴維

李播

李德裕

鄭還古

裴休

薛宜僚

九老會胡杲

吉皎

劉真

鄭據

盧真

張渾

白居易

卷四

項斯

滕邁

裴思謙

廖有方

姚合

宋雍

段文昌

劉郁伯

陳彥博

郭良驥

崔嘏

唐球

白敏中

魏扶

馬植

崔鉉

裴夷直

楊敬之

喻鳧

楊衡

王彥威

繁知一

雍裕之

張祐

李商隱

劉得仁

王智興

馬戴

鄭顥

李群玉

溫庭筠

王起

丁稜

黃頰

鄭畋

李彙征

劉威

崔郊

來鵬

杜牧

許渾

雍陶

李遠

趙嘏

韋承貽

段成式

韋蟾

李敬方

李郢

李洞

長孫翺

崔魯

高蟾

卷五

于武陵

李頻

劉魯風

褚載

汪遵

盧渥

滕倪

費冠卿

李廓

薛能

曹鄴

聶夷中

張林

崔塗

章碣

方干

衛準

司空圖

秦韜玉

高駢

翁承贊

皮日休

盧延遜

裴說

張爲

韓偓

曹松

杜荀鶴

鄭綮

錢珝

嚴惲

王渙

張曙

翁綬

袁皓

李濤

王祝

韋莊

吳融

公乘億

羅鄴

羅隱

許棠

張蠙

鄭谷

溫憲

李昌符

李山甫

鍾離權

張道古

胡曾

伍唐珪

卷六

韓定辭

同谷子

沈彬

周朴

孫魴

王易簡

范攄之子

鄭雲叟

僧子蘭

僧靈澈

僧靈一

僧清江

僧廣宣

僧法振

僧皎然

僧文秀

僧棲白

曾懷濬

僧可朋

僧雲表

僧貫休

僧齊己

僧西蟾

僧清塞

僧文益

僧修睦

僧景雲

僧可止

僧卿雲

僧處默

僧澹交

僧若虛

僧曇域

僧懷浦

僧慕幽

僧尚顏

開元宮人

崔氏

劉氏

薛媛

李季蘭

如意中女子

魚玄機

僖宗宮人

張建封妓

女郎宋若照

女郎張窈窕

女郎劉媛

鶯鶯

不知名

權龍褒



全唐詩話目錄 終

全唐詩話卷之一

明海虞毛晉子晉訂

太宗

貞觀六年九月帝幸慶善宮帝生時故宅也因與  
 貴臣宴賦詩起居郎請平宮商被之管絃命曰功  
 成慶善樂使童子八佾為九功之舞大宴會與破  
 陣舞偕奏於庭

帝嘗作宮體詩使虞世南賡和世南曰聖作誠工

然體非雅正上有所好下必有甚焉恐此詩一傳天下風靡不敢奉詔帝曰朕試卿爾後帝爲詩一篇述古興亡旣而嘆曰鍾子期死伯牙不復鼓琴朕此詩何所示耶敕褚遂良卽世南靈座焚之貞觀二十年秋帝幸靈州時破薛延陀回紇諸部遣使入貢乞置官司上爲詩序其事曰雪恥酬百王除凶報千古公卿請勒石於靈州從之

高宗

太平公主武后所生后愛之傾諸女帝擇薛紹尙之假萬年縣爲婚館門隘不能容翟車有司毀垣以入自興安門設燎相屬道樾爲枯當時群臣劉禕之詩云夢梓光青陛穠桃藹紫宮元萬頃云離元應春夕帝子降秋期任奉古云帝子升青陛王姬降紫宸郭正一云桂宮初服冕蘭掖早生笄皆納妃出降之意也

中宗

九月九日幸臨渭亭登高作云九日正乘秋三杯  
興已周泛桂迎罇滿吹花向酒浮長房萸早熟彭  
澤菊初收何藉龍沙上方得恣淹留時景龍三年  
也序云陶潛盈把既浮九醞之歡畢卓持螯須盡  
一生之興人題四韻同賦五言其最後成罰之引  
滿韋安石得枝字云金風飄菊蕊玉露泣萸枝蘇  
瓊得暉字云恩深答效淺留醉奉宸暉李嶠得歡  
字云令節三秋晚重陽九日歡蕭至忠得餘字云

寵極萸房遍恩深菊酎餘竇希玠得明字云九辰  
陪聖膳萬歲奉承明韋嗣立得深字云願陪歡樂  
事長與歲時深李迥秀得風字云霽雲開曉日仙  
藻麗秋風趙彥伯得花字云簪挂丹萸藥杯涵紫  
菊花楊廉得亭字云遠日瞰秦堦重陽坐灞亭岑  
羲得淡字云爰豫矚秦堦昇高臨灞淡盧藏用得  
開字云萸依珮裏發菊向酒邊開李咸得直字云  
菊黃迎酒泛松翠凌霜直閣朝隱得筵字云簪紱

趨皇極笙歌接御筵沈佺期得長字云臣歡重九  
慶日月奉天長薛稷得曆字云願陪九九辰長奉  
千千曆蘇頲得時字云年數登高日延齡命賞時  
李乂得濃字云捧篋萸香遍稱觴菊氣濃馬懷素  
得酒字云蘭將葉布席菊用香浮酒陸景初得臣  
字云登高識漢苑問道侍軒臣韋元旦得月字云  
雲物開千里天行乘九月李適得高字云禁苑秋  
光入宸遊霽色高鄭南金得日字云風起韻虞絃

雲開吐堯日于經野得樽字云桂筵羅玉俎菊醴  
溢芳樽盧懷慎得還字云鶴似聞琴至人疑宴鎬  
還是宴也韋安石蘇瓌詩先成于經野盧懷慎最  
後成罰酒

十月帝誕辰內殿宴聯句潤色鴻業寄賢才帝云

叨居右弼媿鹽梅李嶠運籌帷幄荷時來宗楚客

職掌圖籍濫蓬萊劉憲兩司謬忝謝鍾裴崔湜禮

樂銓管效塵埃鄭愔陳師振旅清九垓趙彥昭忻

承顧問侍天杯

李適

銜恩獻壽栢梁臺

蘇頌

黃縑

青簡奉康哉

盧藏用

宗伯秩禮天地開

薛稷

帝歌

難續仰昭回

宋之問

微臣捧日變寒灰遠慙班左

愧遊陪

上官婕妤

帝謂侍臣曰今天下無事朝野

多歡欲與卿等詞人時賦詩宴樂可識朕意不須

惜醉大學士李嶠宗楚客等跪奏曰臣等多幸同

遇昌期謬以不才策名文館思勵駑朽庶裨河嶽

既陪天歡不敢不醉此後每遊別殿幸離宮駐蹕

芳苑鳴笳仙禁或戚里宸筵王門蚤席無不畢從

景龍四年正月五日御大明殿會吐蕃騎馬之戲

因重爲栢梁體聯句帝曰大明御宇臨萬方皇后

曰顧慚內政翊陶唐長寧公主曰鸞鳴鳳舞向平

陽安樂公主曰秦樓魯館沐恩光太平公主曰無

心爲子輒求郎溫王重茂曰雄才七步謝陳王昭

容上官曰當熊讓輦愧前芳吏部侍郎崔湜曰再

司銓管恩何忘著作郎鄭愔曰文江學海思濟航

考功員外郎武平一曰萬邦考績臣所詳著作郎  
閻朝隱曰著作不休出中腸時上疑御史大夫竇  
從一將作大匠宗晉卿素不屬文未卽令續二人  
固請許之從一曰權豪屏跡肅嚴霜晉卿曰鑄鼎  
開嶽造明堂此外遺忘時吐蕃舍人明悉獵請令  
授筆與之曰玉醴由來獻壽觴上大悅賜與衣服

玄宗

左丞相說右丞相璟太子少傅乾曜同上官命宴

東堂賜詩云赤帝收三傑黃軒舉二臣由來丞相  
重分掌國之鈞我有握中璧雙飛席上珍子房推  
要道仲子訝風神復輟台衡老將爲調護人鷓鴣  
同拜日車騎擁行塵樂聚南宮宴觴連北斗醇俾  
予成百揆垂拱問彝倫

開元十六年帝自擇廷臣爲諸州刺史許景先治  
虢州源光裕鄭州寇泚宋州鄭溫琦邠州袁仁恭  
杭州崔志廉襄州李昇期邢州鄭放定州蔣挺湖

州裴觀滄州崔成遂州凡十一人行詔宰相諸王  
 御史以上祖道洛濱盛具奏太常樂帛舫水嬉命  
 高力士賜詩令題座右帝親書且給筆紙令自賦  
 賚絹三千遣之

帝詩云眷言思共理鑿寐想惟良猗歟此推擇聲  
 績著周行賢能既俟進黎獻實佇康視人當如子  
 愛人亦如傷講學試誦論阡陌勸耕桑虛譽不可  
 飾清知不可忘求名跡易見安直德自彰獄訟必

以情教民貴有常恤俾且存老撫弱復綏強勉哉  
 各祇命知予眷萬方

德宗

貞元四年九月賜宴曲江亭帝為詩序曰朕在位  
 僅將十載實賴忠賢左右克致小康是以擇三令  
 節錫茲宴賞俾大夫卿士得同歡洽也夫其其戚  
 者同其休有其初者貴其終咨爾群僚順朕不暇  
 樂而能節職思其憂咸若時則庶乎理矣因重陽

之會聊示所懷詩云早衣對庭燎躬化勤意識時  
此萬機暇適與佳節并曲池潔寒流芳菊合金英  
乾坤爽氣澄臺殿秋光清朝野慶年豐高會多歡  
聲永懷無荒戒良事同期情因詔曰卿等重陽會  
宴朕想歡洽欣慰良多情發于中因製詩序令賜  
卿等一本可中書門下簡定文詞士三五十人應  
制同用清字明日內於延英門進來宰臣李泌等  
雖奉詔簡擇難於取舍由是百僚皆和上自考其

詩以劉太真及李紆等四人爲上等鮑防于邵等  
四人爲次等張濛殷亮等二十三人爲下等而李  
晟馬燧李泌三宰相之詩不加考第

韋綬以內相感心疾罷還第帝九日作黃菊歌顧  
左右曰安可不示韋綬遣使持往綬遂奉和附使  
進帝曰爲文不已豈願養耶勅曰自今勿復爾

文宗

裴度拜中書令以疾未任朝謝上巳曲江賜宴群



臣賦詩帝遣中使賜度詩曰注想待元老識君恨  
不早我家柱石衰憂來學丘禱仍賜御札曰朕詩  
集中欲得見卿唱和詩故令示此卿疾未差可他  
日進來御札及門而度薨與詩云  
帝聽政暇博覽群書一日延英顧問宰相詩云  
呦鹿鳴食野之苹苹是何草時宰相楊珪楊嗣復  
陳夷行相顧未對珪曰臣按爾雅苹是藟蕭士曰  
朕看毛詩疏葉圓而花白叢生野中似非藟蕭  
又一日問宰臣古詩云輕衫襯跳脫跳脫是何物  
宰臣未對上曰卽今之腕釧也真詰言安妃有斲  
粟金跳脫是臂飾

嘗吟杜甫曲江篇云江頭宮殿瑣千門細柳新蒲  
爲誰綠乃知天寶以前樓臺之盛鄭注乃命神策  
軍淘曲江昆明二池許公卿立亭館兩軍造紫雲  
樓彩霞亭內出樓額賜之

宣宗

帝好進士及第每對朝臣問及苟有科名對者必大喜便問所試詩賦題目并主司姓名或佳人物偶不中第必歎惜移時嘗於內自題鄉貢進士李道龍白居易之死帝以詩弔之曰綴玉聯珠六十年誰教冥路作詩仙浮雲不繫名居易造化無爲字樂天童子解吟長恨曲胡兒能唱琵琶篇文章已滿行人耳一度思卿一愴然帝製秦邊陲曲其詞曰海岳咸通及帝垂拱而年號咸通焉庶子裴

暉進詩賀聖政有太康字帝怒曰太康失邦乃以比我戶部韋渙奏云晉平吳寇改號太康雖有失邦之言乃見歸美之文上曰天子大須博覽不然幾錯暉罪

舊制盛春內殿賜宴三日帝妙音律每先裁製新曲俾禁中女伶迭相教授至是出宮女數百分行連袂而歌其曲有曰播皇猷者率高冠方屨褒衣博帶趨走俯仰皆合規矩于于然有唐堯之風焉

有曰慈女蹕歌隊者率言慈嶺之士樂河湟故地  
歸國復爲唐民也若霓裳曲者皆執節幡被羽服  
態度凝碧飄飄然有翔雲舞鶴見左右如是數十  
曲流傳民間出令狐澄  
正陵遺事

### 昭宗

陝府唐昭宗有詩云安得有英雄迎歸大內中或  
曰逍遙樓有太宗詩云昔乘匹馬去今驅萬乘來  
志意不侔矣

### 武后

天授二年臘卿相欲詐稱花發請幸上苑有所謀  
也許之尋疑有異圖先遣使宣詔曰明朝遊上苑  
火急報春知花須連夜發莫待曉風吹於是凌晨  
名花布苑群臣咸服其異后託術以移唐祚此皆  
妖妄不足信也凡太后之詩文皆元萬頃崔融輩  
爲之

萬歲通天元年鑄九鼎成置于東都明堂之庭后

自製曳鼎歌令曳鼎者唱和開元二年太子賓客薛謙光獻東都九鼎銘其蔡州鼎銘武后所製文曰犧農首出軒昊應期唐虞繼踵湯禹乘時天下光宅域內雍熙上玄降靈方建隆基紫薇令姚崇奏曰聖人啓運休兆必彰請宣付史館

明皇御名已兆於此

### 徐賢妃

貞觀二十三年上疏諫太宗息兵罷役其略曰大業者易驕願陛下難之善始者難終願陛下易之又曰漆器非延叛之方桀造之而人叛玉杯豈招亡之術紂用之而國亡侈麗之源不可不遏作法於儉猶恐其奢作法於奢何以制後

### 上官昭容

張說作昭容文集序云古者有女史記功書過有女尚書決事宮闈昭容兩朝專美一日萬機顧問不遺應接如響雖漢稱班媛晉譽左嬪文章之道不殊輔佐之功則異迹秘九天之上身沒重泉之

下嘉猷令範代罕得聞庶姬後學嗚呼可仰然則  
大君據四海之圖懸百靈之命喜則九圍挾纘怒  
則千里流血靜則黔黎又安動則蒼旻罷弊入耳  
之語諒其難乎貴而勢大者疑賤而禮絕者隔近  
而言輕者忽遠而意忠者忤惟窈窕柔曼誘掖善  
心忘味九德之衢傾情六藝之圃故登崑巡海之  
意寢剪胡刈越之威息璿臺珍服之態消從禽嗜  
樂之端廢獨使溫柔之教漸於生人風雅之聲流

於來葉非夫元黃毓粹正明助思衆妙扶識群靈  
挾志誕異人之寶授興王之瑞其孰能臻斯懿乎  
鎮國太平公主道高帝妹才重天人昔嘗共游東  
璧同宴北海倏來忽往物在人亡閼雕瑄之殘言  
悲素扇之空曲上聞天子求椒房之故事有命史  
臣叙蘭臺之新集

中宗正月晦日幸昆明池賦詩群臣應制百餘篇  
帳殿前結綵樓命昭容選一篇爲新翻御製曲從

全唐詩話 十三  
臣悉集其下須臾紙落如飛各認其名而懷之既  
退惟沈宋二詩不下移時一紙飛墜競取而觀乃  
沈詩也及聞其評曰二詩工力悉敵沈詩落句云  
微臣雕朽質羞覩豫章才蓋詞氣已竭宋詩云不  
愁明月盡自有夜珠來猶陡健舉沈乃伏不敢復  
爭宋之問詩曰春豫靈池近滄波帳殿開舟凌石  
鯨動槎拂斗牛回節晦莫全落春遲柳暗催象溟  
看浴景燒劫辯沉灰鎬飲周文樂汾歌漢武才不

愁明月盡自有夜珠來昭容名婉兒西臺侍郎儀  
之孫父廷芝與儀死武后時母鄭方姪夢巨人界  
大秤曰持此秤量天下昭容生踰月母戲曰秤量  
者豈汝耶輒啞然應後內秉機政符其夢云自通  
天以來內掌詔命中宗立進拜昭容帝引名儒賜  
宴賦詩婉兒常代帝及后長寧安樂二公主衆篇  
並作而采麗益新又差第群臣所賦賜金爵故朝  
廷靡然成風當時屬詞大抵浮靡然皆有可觀昭

容力也韋后之敗斬闕下

### 孔紹安

大業末爲監察御史高祖爲隋討賊河東紹安監其軍深見接遇高祖受禪紹安自洛陽間行來奔高祖大悅拜內史舍人時夏侯端亦嘗爲御史先來歸紹安授秘書監因侍宴詠石榴有祇爲時來晚開花不見春之句武德中令狐德棻欲補正歷代史詔各差官主修一代紹安以中書舍人與崔

善爲蕭德言主梁多歷年不能就皆罷之紹安在隋時與孫萬壽以文辭稱時謂孔孫

### 虞世南

顏師古隋朝遺事載洛陽獻合蒂迎輦花煬帝令袁寶兒持之號司花女時詔世南草征遼指揮德音勅於帝側寶兒注視久之帝曰昔傳飛燕可掌上舞今得寶兒方昭前事然多憨態今注目於卿卿才人可便嘲之世南爲絕句曰學畫鴉黃半未

成垂肩彈袖太憨生緣憨却得君王惜長把花枝  
傍輦行

魏徵

太宗在洛陽宮幸積翠池宴酣各賦一事帝賦尚  
書曰日昃翫百篇臨燈披五典夏康旣逸豫商辛  
亦荒酒恣情昏主多克已明君鮮滅身資累惡成  
名由積善徵賦西漢曰受降臨軹道爭長趣鴻門  
驅傳渭橋上觀兵細柳屯夜宴經柏谷朝遊出杜

原終藉叔孫禮方知皇帝尊帝曰徵言未嘗不約  
我以禮

李百藥

百藥七歲能屬文齊中書舍人陸又嘗過其父德  
林有說徐陵文者云藉琅琊之稻坐客並不識其  
事百藥進曰傳稱邠人藉稻注云邠國在琅琊開  
陽縣人皆驚喜曰此兒卽神童百藥幼多病祖母  
以百藥爲名名臣之子才行相繼四海名流莫不



宗仰藻思沉鬱尤長五言雖樵童牧子亦皆吟諷  
及懸車告老怡然自得穿池鑿山文酒譚詠以盡  
平生之志年八十五先是和太宗帝京篇手詔曰  
卿何身之老而才之壯齒之宿而意之新乎子安  
期永徽末遷中書舍人自德林至安期三代掌制  
誥安期孫義仲又爲中書舍人

長孫無忌

無忌嘲歐陽詢形狀猥陋云聳膊成山字埋肩畏  
出頭誰令麟閣上畫此一獼猴詢應聲曰索頭連  
背煖漫襦畏肚寒祇緣心渾渾所以面團團太宗  
笑曰詢殊不畏皇后耶

王勃

太宗嘗謂唐儉酒杯流行發言可喜是時天下初  
定君臣俱欲無爲酒杯善謔理亦有之高宗雖不  
君然亦深察事機當時諸王鬪雞王勃在沛王府  
戲爲文檄英王帝見之大怒曰此殆交鬪之漸卽

全唐詩話 十七  
日竄勃以太宗之賢杯酒一時之樂何足爲後世  
戒及其弊也中宗詔群臣曰天下無事欲與群臣  
共樂於是迴波艷辭妖冶之舞作於文字之臣而  
綱紀蕩然矣創業之難也一觴一詠足以肇亂況  
其甚焉者哉

馬周

凌朝浮江旅思詩云太清初上日春水送孤舟山  
遠疑無樹潮平似不流岸花開且落江鳥沒還浮

羈望傷千里長歌遣四愁

李義府

義府初遇以李大亮劉洎之薦太宗召令詠烏義  
府曰日裏颺朝彩琴中聞夜啼上林如許樹不借  
一枝棲帝曰與卿全樹何止一枝

杜淹

杜淹始見袁天綱於洛天綱謂曰蘭臺成就學堂  
廣寬又曰二十年外終恐責黜暫去卽還武德六

年以善隱太子俱配流雋州淹至益州見天綱曰  
洛邑之言何其神也天綱曰不久即回至九年六  
月召入天綱曰杜公至京師即得三品要職淹至  
京拜御史大夫檢校吏部尚書贈天綱詩曰伊呂  
深可慕松喬定是虛繫風終不得脫屣欲安如且  
珍純素美當與薜蘿疎既逢楊得意非復久閒居

蘇味道

趙州蘇味道與里人李嶠號蘇李武后朝爲相世

號模稜手

上元云火樹銀花合星橋鐵鎖開暗塵隨馬去明  
月逐人來游妓皆穠李行歌盡落梅金吾不禁夜  
玉露莫相催

駱賓王

世稱王楊盧駱楊盈川之爲文好以古人姓名連  
用如張平子之畧談陸士衡之所記潘安仁宜其  
陋矣仲長統何足知之號爲黠鬼簿賓王文好以

數對如秦地重關一百二漢家離宮三十六號爲  
筭博士帝京篇曰倏忽搏風生羽翼須臾失浪委  
泥沙賓王後與徐敬業興兵揚州大敗逃死此其  
識也

### 陳子昂

獨異記載子昂初入京不爲人知有賣胡琴者價  
百萬豪貴傳視無辯者子昂突出顧左右以千緡  
市之衆驚問答曰余善此樂皆曰可得聞乎曰明

日可集宣陽里如期偕往則酒肴畢具置胡琴於  
前食畢捧琴語曰蜀人陳子昂有文百軸馳走京  
轂碌碌塵土不爲人知此樂賤工之役豈宜留心  
舉而碎之以其文軸遍贈會者一日之內聲華溢  
都時武攸宜爲建安王辟爲書記

### 李日知

鄭州李日知景龍初爲相初安樂公主館第成中  
宗臨幸燕從官賦詩日知卒章曰所願但知居者

樂無使時稱作者勞獨以規戒睿宗他日謂曰向時雖朕亦不敢諫非卿亮直何能爾卽拜侍郎中

李景伯

景伯中宗宰相懷遠之子景龍初爲諫議大夫中宗宴侍臣酒酣各命爲迴波辭景伯獨爲箴規帝不悅蕭至忠曰真諫官也迴波辭曰迴波爾時酒卮微臣職在箴規侍燕旣過三爵誼譁切恐非儀

崔融

久視元年改控鶴府爲奉宸府張易之爲奉宸令引詞人爲供奉佞者奏云昌宗王子晉後身令被羽衣吹簫乘木鶴奏樂於庭融賦詩爲絕唱有昔遇浮丘伯今同丁令威中郎才貌是藏史姓名非之句後與宰相蘇味道相誚云融詩所以不及相公無銀花合蘇有詩云火樹銀花合味道云子詩雖無銀花合還有金銅丁取令威之句也

李適

初中宗景龍二年始於修文館置大學士四員學士八員直學士十二員象四時八節十二月於是李嶠宗楚客趙彥昭韋嗣立爲大學士李適劉憲崔湜鄭愔盧藏用李义岑義劉子玄爲學士薛稷馬懷素宋之問武平一杜審言沈佺期閻朝隱爲直學士又召徐堅韋元旦徐彥伯劉允濟等滿員其後被選者不一凡天子饗會游豫惟宰相直學士得從春幸黎園並渭水夜除則賜柳圈辟癘夏

宴蒲萄園賜朱櫻秋登慈恩浮圖獻菊花酒稱壽冬幸新豐歷白鹿觀登驪山賜浴湯池給香粉蘭澤從行給翔麟馬品官黃衣各一帝有所感卽賦詩學士皆屬和當時人所欽慕然皆狎猥佻佻忘君臣禮法惟以文華取幸若韋元旦劉允濟沈佺期宋之問閻朝隱等無他稱景龍二年七月七夕御兩儀殿賦詩李嶠獻詩云誰言七襄詠流入五

絃歌

是日李行言唱步虛歌

九月幸慈恩寺塔上官氏獻詩

群臣並賦閏九月幸總持登浮圖李嶠等獻詩十

月三日幸三會寺十一月十五日中宗誕辰內殿

聯句為柏梁體二十一日安樂公主出降武廷秀

是月以婕妤上官為昭容十二月六日上幸薦福

寺鄭愔詩先成舊邸三乘宋之問後進駕象法三

立春侍宴賦詩二十一日幸臨渭亭李嶠等應制

三十日幸長安故城十二月晦諸學士入閣守歲

以皇后乳母戲適御史大夫竇從一往來其家遂

三年元日清暉閣登高遇雪宗楚客詩云蓬萊雪

作山是也因賜金綵人勝李嶠等七言詩千鍾聖

披是日甚歡上令學士遞起屢舞至沈佺期賦迴

波有齒綠牙緋之語晦日幸昆明池宋之問詩自

有夜珠來之句至今傳之二月八日送沙門元奘

等歸荊州李嶠等賦詩十一日幸太平公主南莊

七月幸望春宮送朔方節度張仁亶赴軍八月三

日幸安樂公主西莊九月九日幸臨渭亭分韻賦

詩韋安石十一月一日安樂公主入新宅賦詩十

先成

五日中宗誕辰長寧公主滿月李嶠詩神龍見象  
日仙鳳養雛年是也二十三日南郊徐彥伯上南  
郊賦十二月十二日幸溫泉宮勅蒲州刺史徐彥  
伯入仗同學士例因與武平一等五人獻詩上官  
昭容獻七言絕句三首十四日幸韋嗣立莊拜嗣  
立逍遙公名其居曰清虛原幽棲谷十五日幸白  
鹿觀十八日遊秦始皇陵四年正月朔賜群臣栢

樹五日蓬萊宮宴吐蕃使因爲栢梁體

吐蕃舍人亦賦七

日重宴大明殿賜綵鏤人勝又觀打球八日立春

賜綵花二十九日晦幸滻水二月一日送金城公

主三日幸司農少卿王光輔莊是夕岑羲設茗飲

討論經史武平一論春秋崔日用請北面日用贈

武平一歌曰彼名流兮左氏癖意玄遠兮冠今夕

二十一日張直至自朔方宴于桃花園賦七言詩

明日宴承慶殿李嶠桃花園詞因號桃花行三月



一日清明幸梨園命侍臣爲拔河之戲三日上巳  
 祓禊於渭濱賦七言詩賜細柳園八日令學士尋  
 勝同宴於禮部尙書竇希琳亭賦詩張說爲之序  
 十一日宴於昭容之別院二十七日李嶠入都祔  
 廟徐彥伯等餞之賦詩四月一日幸長寧公主莊  
 六日幸興慶池觀競度之戲其日過希琳宅學士  
 賦詩二十九日御宴祝欽明爲八風舞諸學士曰  
 祝公斯舉五經掃地盡矣睿宗時道士司馬承禎

還天台適贈詩詞甚美朝士屬和三百餘人徐彥

伯編爲白雲記

徐彥伯

徐彥伯爲文多變易求新以鳳閣爲鶴閣龍門爲  
 虬戶金谷爲銑溪玉山爲瓊岳竹馬爲篠驂月兔  
 爲魄兔進士效之謂之澁體

李嶠

皮日休松窓錄云中宗嘗召宰相蘇瓌李嶠之子

進見時皆同年帝謂曰汝等各以所通書取宜奏者爲吾言之頰應曰木從繩則正后從諫則聖嶠之子亡其名亦奏曰斲朝涉之脛剖賢人之心帝曰蘇瓌有子李嶠無後

蘇頌

長安盛春遊頌製詩云飛埃結紅霧遊蓋飄青雲明皇嘉賞以御花報插其中上時榮之

沈佺期

張燕公說嘗謂佺期曰沈三兄詩須還他第一佺期字雲卿相州人除給事中考功郎受贓劾未寃會張易之敗遂長流驩州稍遷台州錄事參軍入計召見拜起居郎兼修文直學士侍宴爲弄辭悅

帝賜牙緋尋爲太子詹事開元初卒

佺期迴波樂詞云迴波爾

時佺期流向嶺外生歸身名已蒙齒錄袍笏未復牙緋

魏建安後訖江左詩律屢變至沈約庾信以音韻相婉附屬對精密及宋之問沈佺期又加靡麗回

忌聲病約句準篇如錦繡成文學者宗之號爲沈  
宋語曰蘇李居前沈宋比肩謂蘇武李陵也

李行言

景龍中中宗引近臣宴集令各獻伎爲樂張錫爲  
談客娘舞宗晉卿舞渾脫張洽舞黃麀杜元琰誦  
婆羅門呪行言唱駕車西河盧藏用效道士上章  
國子司業郭山暉請誦古詩兩篇誦鹿鳴蟋蟀未  
畢李嶠以詩有好樂無荒之語止之行言隴西人

兼文學幹事函谷關詩爲時人所許中宗時爲給  
事中能唱步虛歌帝七月七日御兩儀殿會宴帝  
命爲之行言於御前長跪作三洞道士青詞歌曲  
貌偉聲暢上頗嘆美

張元一

武后朝左司郎中張元一善滑稽時西戎犯邊武  
懿宗統兵禦之至邠畏懦而遜元一朝曰長弓短  
度箭蜀馬臨高驩去賊七百里隈牆獨自戰忽前

逢著賊騎猪向南竄則天未曉曰懿宗無馬耶元  
一曰騎猪夾豕也則天大笑后嘗問元一外有何  
事曰有三慶旱而雨洛橋成郭洪霸死

洪霸酷吏也

### 劉希夷

劉希夷一名庭芝汝州人少有文華好為宮體詩  
詞旨悲苦不為時急所重善彈琵琶嘗為白頭翁  
詠云今年花落顏色改明年花開復誰在既而自  
悔曰我此詩讖與石崇白首同所歸何異乃更作

一聯云年年歲歲花相似歲歲年年人不同既而  
又嘆曰此句復仍似向讖矣然死生有命豈復由  
此即兩存之詩成未周歲為奸人所殺或云宋之  
問害之後孫翌撰正聲集以希夷詩為集中之最  
由是大為人所稱

或云之問害希夷以洛陽篇為已作至今載此篇在之問集中

### 張敬忠

先天中王主敬為侍御史自以才望華妙當入省  
臺前行忽除膳部員外郎微有悵惋吏部郎中張

敬忠戲詠曰有意嫌兵部專心望考功誰知腳踏  
蹬幾落省牆東蓋膳部在省最東北隅也

張說

張說謫岳州常鬱鬱不樂時宰相以說機辯才畧  
互相排擯蘇頲方大用說與壞善說因爲五君詠  
致書封其詩以貽頲誠其使曰當候忌日近暮送  
之使者近暮弔客至多說先公僚舊頲覽詩嗚咽  
流涕翌日上對大陳說忠正蹇諤人望所屬不宜

淪滯遐方上因降璽書勞問俄遷荊州長史由是  
陸象先韋嗣立張庭珪賈曾皆以譴逐歲久因加  
甄敘頲以父之執友事之甚謹

王冷然上燕公書云詩云投我以木瓜報之以瓊  
琚此言雖小可以喻大相公五君詠曰淒涼丞相  
府餘慶在元成蘇公一聞此詩移公於荆府積漸  
至相由蘇得也今蘇屈居益部公坐廟堂投木報  
瓊義將安在亦可舉蘇以自代然後爲朔方之行

冷然書又曰相公岳陽樓送別詩云誰念三千里  
江潭一老翁今日忘往日之棲遲貪暮年之富貴  
可乎

宋璟

劉禹錫獻權舍人書曰昔宋廣平之沉下僚也蘇  
公味道時爲繡衣直指使者廣平投以梅花賦蘇  
盛稱之自是方列於聞人之目名遂振鳴呼以廣  
平之才未爲是賦則蘇公未暇知其人耶將廣平

困於窮阨於躓然後爲是文耶是知英賢卓犖可  
外文字然猶用片言借說於先達之口席其勢而  
後驥首當時矧碌碌者疇能自異

王灣

王灣登先天進士第開元初爲滎陽主簿馬懷素  
欲校正群籍灣在選中各部撰次後爲洛陽尉商  
璠云灣詞翰早著爲天下所稱最者不過一二遊  
吳中江南意云海日生殘夜江春入舊年詩人以

來無聞此句張公居相府手題於政事堂每示能  
文令爲楷式又擣衣篇云月華照杵空悲妾風響  
傳砧不見君所有衆製類咸若斯非張蔡輩之未  
見覺顏謝之彌遠乎江南意云南國多新意東行  
伺早天潮平兩岸失風正一帆懸海日生殘夜江  
春入舊年從來觀氣象唯向此中偏

姚崇

口箴云君子欲訥吉人寡辭利口作戒長舌爲詩

斯言不善千里違之勿謂可復駟馬難追雅靜惟  
默澄神之極去甚去泰居物之外多言多失多事  
多害聲繁則淫音希則大室本無暗垣亦有耳何  
言者天成蹊者李似不能言爲世所尊言不出口  
冠時之首無掉爾舌以速爾咎無易爾言亦孔之  
醜欽之謹之可大可久欽之伊何三命而走謹之  
伊何三緘其口勉哉夫子行矣勉旃書之屋壁以

代韋弦

李德裕舌箴序曰余宿于洞庭西夢與中書令姚公偶坐如舊相識問余曰君見僕所作口箴乎余對曰去歲居守東門於公會孫諫議邵處觀金石之刻遂筦爾而笑曰孫子猶能藏之又曰余感姚公之夢乃爲舌箴云

### 趙仁獎

令乘驄馬去丞脫繡衣來仁獎送上蔡令潘好禮拜御史詩也或疑其假手蓋仁獎在王戎墓側善

歌黃輦景龍中負薪詣闕云助國調鼎卽除臺官中書令姚崇曰此是黃輦耶授以當州一尉惟以黃輦自銜宋務光嘲之曰趙仁獎出王戎墓下入朱博臺中捨彼負薪登茲列柏行人不避驄馬坐客惟聽黃輦忽一夫負兩束薪曰此合拜殿中人問其由曰趙以一束拜監察此兩束合授殿中

### 金昌緒

春怨詩云打却黃鶯兒莫教枝上啼幾回驚妾夢



不得到遼西

顧陶取此詩為唐類詩

### 張九齡

九齡在相位有蹇諤匪躬之誠明皇既在位久稍怠庶政每見帝極言得失林甫時方同列陰欲中之將加朔方節度使牛仙客實封九齡稱其不可甚不叶帝旨他日林甫請見屢陳九齡頗懷誹謗于時方秋帝命高力士持白羽扇以賜將寄意焉九齡惶恐因作賦以獻又為燕詩以貽林甫曰海

燕何微眇乘春亦暫來豈知泥濘濺只見玉堂開  
繡戶時雙入華軒日幾回無心與物競鷹隼莫相猜  
林甫覽之知其必退恚怒稍解

### 王維

集異記載王維未冠文章得名妙能琵琶春之一  
日岐公引至公主第使為伶人進主前維進新曲  
號鬱輪袍并出所作主大奇之令宮婢傳教遂召  
試官至第論之作解頭登第

祿山之亂李龜年奔放江潭會於湘中採訪使筵上唱云紅豆生南國秋來發幾枝贈君多採擷此物最相思又秋風明月苦相思蕩子從戎十載餘征人去日慙慙囑歸鴈來時數附書此皆王維所製而黎園唱焉

王維年十七時九日憶山東弟兄云獨坐異鄉爲異客每逢佳節倍思親遙知兄弟登高處遍插茱萸少一人祿山大會凝碧池黎園弟子歛歔泣下

樂工雷海清擲樂器西向大慟賊支解於試馬殿維時拘於菩提寺有詩曰萬戶傷心生野烟百僚何日更朝天秋槐落葉深宮裏凝碧池頭奏管絃後有罪以此詩獲免寧<sub>也</sub>憲貴盛寵妓數十人有賣餅之妻纖白明媚王一見屬意因厚遺其夫求之寵愛逾等歲餘因問曰汝復憶餅師否使見之其妻注視雙淚垂頰若不勝情時王坐客十餘人皆當時文士無不悽異王命賦詩維先成云莫以

今時寵難忘異日恩看花滿眼淚不共楚王言坐

客無敢繼者王乃歸餅師以終其志

出本事詩

或說維詠終南山詩譏時也詩曰太一近天都連

山接海隅言勢焰盤據朝野也白雲回望合青靄

入看無言徒有其表也分野中峰變晴陰衆壑殊

言恩澤偏也故人投宿處隔水問樵夫畏禍深也

商璠曰維詩辭秀調雅意新理愜在泉爲珠等壁

成繪一字一句皆出常境至如落日山水好漾舟

信歸風又澗芳襲人衣山月映石壁又天寒遠山

靜日暮長河急又賤日豈殊衆貴來方悟稀又日

暮沙漠陲戰聲烟塵裏詎肯慚於古人也

### 王縉

王縉九月九日作云莫將邊地比京都八月嚴霜

草已枯今日登高樽酒裏不知能有菊花無

### 賀知章

賀知章年八十六臥病冥然無知疾損上表乞爲

道士還鄉明皇許之捨宅為觀賜名千秋命其男

曾子會稽郡司馬賜鑑湖剡川一曲

元乞官湖一曲為放生池

因賜剡川一曲

詔令供帳東門百僚祖餞御製送詩并序

云天寶三年太子賓客賀知章鑒止足之分抗歸

老之疏解組辭榮志期入道朕以其年在遲暮用

循掛冠之事俾遂赤松之遊正月五日將歸會稽

遂餞東路乃命六卿庶尹大夫供帳青門寵行邁

也豈惟崇德尚齒抑亦勵俗勸人無令二疎獨光

漢冊乃賦詩贈行詩云遺榮期入道辭老竟抽簪

豈不惜賢達其如高尚心環中得祕要方外散幽

襟獨有青門餞群英悵別深又云筵開百壺餞詔

許二疎歸仙記題金籙朝章換羽衣悄然承睿藻

行路滿光輝

李嘉祐

送王收往吉州謁王使君云細草綠汀洲王孫耐

薄遊年華初冠帶文體舊弓裘野渡花爭發春塘

水亂流使君矜小阮應念倚門愁

仲夏江陰官舍寄裴明府云萬室邊江次孤城對

海安朝霞晴作雨濕氣曉生寒苔色侵衣桁潮痕

上井欄題書招茂宰思爾欲辭官

高武云嘉祐袁州人振藻天朝大收芳譽中興高

流也與錢郎別為一體往往涉於齊梁綺美婉麗

蓋吳筠何遜之敵也至於野渡花爭發春塘水亂

流朝霞晴作雨濕氣晚生寒文華之冠冕也又禪

心超忍辱梵語問多羅設使許詢更生孫綽復出  
窮思極筆未到此境

張均

均丞相說之子也說最鍾愛其情見於岳州別均  
之詩說為丞相知官考均時任中書舍人特注之  
曰父教子忠古之善訓祁奚舉子義不務私至於  
潤色王言彰施帝載道叅墳典例絕功常恭聞前  
烈尤難其任豈以嫌疑敢撓綱紀考上下均能文

全唐詩話 三十七 孟浩然  
為大理卿祿山盜國為僞中書令免死流合浦

王諲

除夜云今歲今宵盡明年明日催寒隨一夜去春  
逐五更來氣色空中改容顏暗裏回風光人不覺  
已著後園梅

孟浩然

皮日休孟亭記云明皇世章句之風大得建安體  
論者推李翰林杜工部為尤介其間能不愧者惟

吾鄉之孟先生也先生之作遇景入詠不拘奇抉  
異令齷齪束人口者涵涵然有干霄之興若公輸  
氏當巧而不巧者也北齊美蕭愨芙蓉露下落楊  
柳月中疎先生則微雲澹河漢疎雨滴梧桐樂府  
美王融日霽沙嶼明風動甘泉燭先生則有氣蒸  
雲夢澤波動岳陽城謝朓之詩句精者有露濕寒  
塘草月映清淮流先生則有荷風送香氣竹露滴  
清聲此與古人爭勝於毫釐間也

建德江宿云移舟泊烟渚日暮客愁新野曠天低  
樹江清月近人

陶峴

陶峴彭澤之孫也開元末家崑山泛遊江湖自制  
三舟與孟彥深孟雲卿焦遂共載吳越之士號爲  
水仙省親南海獲崑崙奴名摩訶善泗水至西塞  
山下泊舟吉祥佛寺見江水深黑謂必有怪物投  
劍命摩訶下取久之支體磔裂浮於水上峴流涕

迴棹賦詩自敘不復遊江湖矣詩云匡廬舊業是  
誰主吳越新居安此生白髮數莖歸未得青山一  
望計還成鴉翻楓葉夕陽動鷺立蘆花秋水明從  
此捨舟何所詣酒旗歌扇正相迎

王昌齡

昌齡字少伯江寧人中第補校書郎又中博學宏  
詞科遷汜水尉不護細行世亂還鄉里爲刺史閭  
丘曉所殺工詩縝而思清時謂王江寧

奉帚平明金殿開，  
且將團扇共徘徊。  
玉顏不及寒鴉色，  
猶帶昭陽日影來。

李清

詠石季倫云：金谷繁華石季倫，  
只能謀富不謀身。  
當時縱與綠珠去，  
猶有無窮歌舞人。

清登天寶十二年進士第

韓滉

聽樂悵然自述萬事傷，  
心對管絃一身含淚向春

烟黃金用盡，  
教歌舞留與他人樂。  
少年

王之渙

出塞詩云：黃沙直上白雲間，  
一片孤城萬仞山。  
羌笛何須怨楊柳，  
春風不過玉門關。

之渙并州人，與兄之咸，  
之賁，皆有文。天寶間人樂  
天作滁州刺史，鄭昶墓誌云：  
與王昌齡、王之渙、崔國輔連唱迭和，  
名動一時。



天并錄陝城史蹟明墓誌云與王昌齡王之與第  
之與并州人與及之與之資皆育文天寶間入樂  
苗何原然賦賦春風不與王門關人

出塞詩云黃少直上白雲間一試飛燕萬山美

王之與

困黃金用盡楚烟飛留與州人樂少半  
白雲向春

全唐詩話卷之二

劉長卿

劉長卿字文房至監察御史以檢校祠部員外郎  
為轉運使判官知淮南鄂岳轉運留後鄂岳觀察  
使吳仲孺誣奏貶播州南巴尉會有疾之辯者除  
睦州司馬終隨州刺史以詩馳聲上元寶應間皇  
甫湜云詩未有劉長卿一句已呼宋玉為老兵矣  
語未有駱賓王一字已罵宋玉為罪人矣其名重

如此  
高仲武云長卿員外有吏幹而犯土兩度遷謫皆  
自取之詩體雖不新奇甚能鍊飾十首已上語意  
稍同於落句尤甚此其短也然春風吳草綠古木  
剡山深明日滄洲路歸雲不可尋又沙鷗驚小吏  
明月上高枝又細雨濕衣看不見閒花落地聽無  
聲截長補短益玉徽之類歟又得罪風霜苦今生  
天地仁傷而不怨亦足以發揮風雅矣

過張明府別業云寥寥東郭外白首一先生考滿  
孤琴在家移五柳成夕陽臨水釣春雨向田耕終  
日空林下何人識此情

餘干旅舍云搖落暮天迥青楓霜葉稀孤城向水  
閉獨鳥背人飛渡口月初上鄰家漁未歸鄉心正  
欲絕何處擣寒衣

送李中丞之襄州云流落征南將曾驅十萬師罷  
歸無舊業老去戀明時獨立三朝盛輕生一劔知

茫茫江漢上日暮欲何之

送嚴士元云春風倚棹闔閭城水國猶寒陰復晴  
細雨濕衣看不見閒花落地聽無聲日斜江上孤  
帆影草綠湖南萬里程東道若逢相識問青袍今  
已誤儒生

章八元

八元題慈恩塔云七層突兀在虛空四十門開面  
面風却怪鳥飛平地上自驚人語半天中迴梯暗

踏如穿洞絕頂初攀似出籠落日鳳城佳氣合滿  
城春樹雨濛濛或云元白見其詩曰不謂嚴維出  
此弟子

高仲武云八元嘗於郵亭偶題數句蓋激元楚以  
辭家維大異之遂親指喻數年充賦擢第至如雪  
晴山脊見沙淺浪痕交得山水狀貌也

八元睦州人登大曆進士第

韋應物

李肇國史補云開元後位卑而名著李北海邕王  
江寧昌齡李館陶鄭廣文虔元魯山德秀蕭功曹  
潁士張長史旭獨孤常州及崔比部元翰梁補闕  
蕭韋蘇州其一也應物仕宦本末似止於蘇按白  
傳答禹錫云敢有文章替左司謂應物也官稱亦  
止此

郡齋雨中與諸文士燕集詩云兵衛森畫戟燕寢  
凝清香海上風雨至逍遙池閣涼煩疴近消散嘉

賓復滿堂自慚居處崇未覩斯民康理會是非遣  
性達形跡忘鮮肥屬時禁蔬果幸見嘗俯飲一杯  
酒仰聆金玉章神歡體自輕意欲凌風翔吳中盛  
文史群彥今汪洋方知大藩地豈曰財賦疆

欲持一瓢酒遠寄風雨夕

句

萬籟自生聽太空常

寂寥還從靜中起却向靜中銷

詠聲

山深松子落

幽人應未眠

句

舟泊南池雨簾捲北樓風

句

右張

爲取作主客圖

全唐詩話 四  
應物寄全椒山中道士云今朝郡齋冷忽憶山中  
客澗底拾枯松歸來煮白石欲持一瓢酒遠寄風  
雨夕落葉遍空山何處尋行跡

朱放

放字長通襄州人隱居剡溪嗣曹王臯鎮江西辟  
節度參謀貞元中召爲左拾遺不就

送著公歸越云誰能愁此別到越會相逢長憶雲  
門寺門前千萬峯石牀堆積雪山路倒枯松莫學

白道士無人知去蹤

李泌

鄴侯家傳云泌賦詩譏揚國忠曰青青東門柳歲  
晏復憔悴國忠訴于明皇上曰賦柳爲譏卿則賦  
李爲譏朕可乎

暢當

當詩平淡多佳句如釣渚亭云花發多遠意鳧鴈  
有閒情遲暉耿不暮平江寂無聲天柱隱所云荒

徑饒松子深蘿絕鳥聲陽崖全帶日寬嶂偶通耕  
山居云水定鶴翻去松欹峯儼如又寒林苞晚菊  
風絮露垂楊湖畔聞漁唱天邊數鴈行皆有遠意

皇甫冉

高仲武云皇甫冉補闕自擢桂禮闈遂爲高格往  
以世道艱虞避地江外每文章一到朝廷作者變  
色於詞場爲先輩推薦卽爲伯仲誰家勝負或逐  
鹿中原如果熟任霜封籬疎從水渡又裛露收新

稼迎寒葺舊廬又燕知社日辭巢去菊爲重陽冒  
雨開可以雄視潘張平揖沈謝又巫山詩終篇皆  
麗自晉宋齊梁周隋以來採掇者無數而補闕獨  
獲驪珠使前賢失步後輩却立自非天假何以迨  
斯恨長轡未聘而芳蘭早凋悲夫

送韓司直云遊吳還適越來往任風波復送王孫  
去其如春草何岸明殘雪在潮滿夕陽多季子留  
遺廟停舟試一過

西陵寄一公云西陵遇風處自古是通津終日空

江上雲山若待人汀洲寒事早魚鳥興情新南望

山陰路吾心有所親

姚合取四詩  
爲極玄集

秋日東林之作云閒看秋水心無事坐對寒松手

自栽廬阜高僧留偈別茅山道士寄書來燕知社

日辭巢去菊爲重陽冒雨開淺薄將何稱獻納臨

岐終日自遲迴

皇甫曾

張汾見訪郊居云林中雨散早涼生已有迎秋促

織聲三徑荒蕪羞對客十年衰老愧稱兄愁心自

惜江籬短世事方看木槿榮君若罷官攜手日尋

山莫算白雲程

曾與劉長卿友善曾過長卿碧澗別業詩云謝客

開山後郊扉去水通江湖十年別衰老一樽同返

照寒川滿平田暮雪空滄洲自有趣不復泣途窮

長卿和云荒村帶晚照落葉亂紛紛古路無行客

寒林獨見君野橋經雨斷澗水向田分不為憐同  
 病何人到白雲曾又寄長卿云南憶新安郡千江  
 帶夕陽斷猿知夜久秋草助江長鬢髮應成素青  
 松獨見霜愛才稱漢主題賦待田郎長卿和云離  
 別江南北汀洲葉再黃路遙雲共水砧迴月如霜  
 歲儉依仁政姑臧相國初臨郡年衰憶故鄉佇看宣室召  
 漢法倚張綱

秦系

系呈韋蘇州云久臥雲間已息機青袍忽著狎鷗  
 飛詩興到來無一事郡中今有謝元暉

系字公緒會稽人隱泉州南安九日山張建封聞  
 系不可致就加授書郎自號東海釣客與劉長卿  
 善權德輿曰長卿自以為五言長城系用偏師攻  
 之矣韋答系云知掩山扉三十秋魚鬚翠碧滿牀  
 頭莫道謝公方在郡五言今日為君休蓋以五言  
 得名久矣年八十餘歲卒南安人號其峯為高士



全唐詩話 八  
山中贈張評事時授右衛佐云終年常避喧自註  
五千言流水閒過院春風與閉門山茶邀上客桂  
實落前軒何事教予起微官不足論

系家剡山向隱一紀大曆五年人或以其文聞於  
留守薛公無何奏系右衛率府倉曹參軍意所不  
欲以疾辭免因將命者獻詩云由來那敢議輕肥  
散髮行歌自採薇逋客未能忘野興辟書令遣脫

荷衣家中匹婦空相笑池上群鷗盡欲飛更乞大  
賢容小隱益看愚谷有光輝

顧況

況字逋翁姑蘇人至德進士性詼諧與柳渾李泌  
爲方外友德宗時渾輔政以秘書郎召及泌相自  
謂當得達官久之遷著作郎況坐詩語調謔貶饒  
州司戶居於茅山以壽終皇甫湜爲況文集序云  
偏於逸歌長句駿發踔厲往往若穿天心出月脇

全唐詩話 九  
意外驚人語非常人所能及最為快也其為人類  
其章句云

山中作云野人愛向山中宿況在葛洪丹井西庭  
前有箇長松樹半夜子規來上啼又汀洲渺渺江  
籬短疑是疑非兩斷腸句巫峽朝雲暮不歸洞庭  
春水晴空滿句顏垣化為陂陸地堪乘舟句大姑  
山盡小姑出月照洞庭行客船句

朱絳

春女怨云獨坐紗窓刺繡遲紫荊枝上嚙黃鸝欲  
知無限傷春意盡在停針不語時顧陶取此  
詩為類選

楊志堅

顏魯公為臨川內史邑有楊志堅者嗜學而貧妻  
厭之一日告離志堅以詩送之曰平生志業在琴  
詩頭上如今有二絲漁父尚知溪谷暗山妻不信  
出身遲荆釵任意撩新鬢明鏡從他別畫眉今日  
便同行路客相逢卽是下山時妻持詩詣州請公

全唐詩話 十  
牒求別醮顏公案其妻曰王歡之廩既虛豈遵黃  
卷朱叟之妻必去寧見錦衣污辱鄉閭敗傷風俗  
若無褒貶僥倖者多遂筆之後無棄其夫者

劉方平

秋夜泛舟云林塘夜泛舟蟲響荻颼颼萬影皆因  
月千聲各爲秋歲華空復晚鄉思不堪愁西北浮  
雲外伊川何處流

方平春怨云紗窓日落漸黃昏金屋無人見淚痕  
寂寞空庭春又晚梨花滿地不開門

戎昱

憲宗朝北狄頻寇邊大臣奏議古者和親有五利  
而無千金之費帝曰比聞有士子能爲詩而姓名  
稍僻是誰宰相對以包子虛冷朝陽皆非也帝遂  
吟曰山上青松陌上塵雲泥豈合得相親世路盡  
嫌良馬瘦唯君不棄臥龍貧千金未必能移性一  
諾從來許殺身莫道書生無感激寸心還是報恩

全唐詩話 十一  
人侍臣對曰此是戎昱詩也京兆尹李鑾擬以女  
嫁昱令其改姓昱固辭焉帝悅曰朕又記得詠史  
一篇云漢家青史內計拙是和親社稷因明主安  
危託婦人豈能將玉貌便欲靜胡塵地下千年骨  
誰爲輔佐臣帝笑曰魏絳之功何其懦也大臣遂  
息和戎之論矣

柳柳

柳與李端盧綸友善有賊平後送客還鄉詩云他

鄉生白髮舊國有青山最有思致

薛昇

勅贈康尚書美人云天門喜氣曉氛氲聖主臨軒  
召冠軍欲令從此行霖雨先賜巫山一片雲康尚  
書日知也

德宗時斬李惟岳以功擢爲深趙節度遷奉誠軍  
陟晉絳尋德宗時河東詩人也

元載

王忠嗣鎮北京以女韞秀歸元載歲久見輕韞秀  
勸之游學元乃游秦爲詩別韞秀曰年來誰不厭  
龍鍾雖在侯門似不容看取海山寒翠樹若遭霜  
霰到秦封妻請偕行曰路掃飢寒跡天哀志氣人  
休零別離淚攜手入西秦

元到京屢陳時務深符上旨肅宗擢拜中書寄諸  
姊妹詩曰相闥已隨麟閣貴家風第一右丞詩笄  
年解笑鳴機婦恥見蘇秦富貴時元肅代兩朝宰  
不久長

相貴盛無比復爲一篇以喻之曰楚竹燕歌動書  
梁春蘭重換舞衣裳公孫開館招佳客知道浮雲  
不久長

元貪恠被誅上令王氏入宮歎曰二十年太原節  
度使女十六年宰相妻誰能爲長信昭陽之事死  
亦幸矣京兆笞斃

楊郁伯

妓人出家云盡出花鈿與四鄰雲鬟剪落厭殘春

暫驚風燭難留世便是蓮花不染身  
貝葉欲翻迷錦字  
梵聲初學誤梁塵  
從今艷色歸空後  
湘浦應無解珮人

梁鐙

詠木老人云刻木牽絲作老翁  
雞皮鶴髮與真同  
須臾弄罷寂無事  
還似人生一夢中

明皇還西內  
每詠此詩

戴叔倫

戴叔倫字幼公潤州人師事蕭穎士為門人冠劉

晏管鹽鐵表主管湖南至雲安楊惠琳反馳客劫  
之曰歸我金幣可緩死叔倫曰身可殺財不可得  
乃捨之累遷至容管經畧德宗嘗賦中和節詩遣  
使者寵賜代還卒

吳明府自遠來留宿云出門逢故友衣服滿塵埃  
歲月不可問山川何處來倚城容敝宅散職寄靈  
臺自此留君醉相歡得幾回

除夜宿石頭驛云旅館誰相問寒燈獨可親一年

全唐詩話 十四  
將盡夜萬里未歸人家寥落悲前事支離笑此身愁  
顏與衰鬢明日又逢春

送友人東歸云萬里楊柳色出關逢故人輕烟拂

流水落日照行塵積夢江湖濶憶家兄弟貧徘徊

灞亭上不語自傷春 姚合取為極玄集

### 于鵠

鵠大曆貞元間詩人也為諸府從事居江湖間有

卜居漢陽及荆南陪樊尚書賞花詩自述曰三十

無名客空山獨臥秋豈以詩窮者耶老大看花猶

未足沿江正遇一枝紅日斜人散東風急吹向誰

家明月中 襄陽座上作

送死多於生幾人得終老 句右張為取主客圖

鵠送客遊邊云若到并州北誰人不憶家寒深無

去伴路盡有平沙磧冷唯逢鴈天春不見花莫隨

邊將意垂老事輕車

江南曲云偶向江邊採白蘋還須女伴賽江神衆

中不敢分明語暗擲金錢卜遠人

韋莊取為又玄集

### 李益

益姑臧人字君虞大曆四年登第其受降城聞笛  
 詩教坊樂人取為聲樂度曲又有寫征人歌早行  
 詩為圖畫者迴樂峰前沙似雪之詩是也益有心  
 疾不見用及為幽州劉濟營田副使獻詩有感恩  
 知有地不上望京樓之句左遷右庶子年且老門  
 人趙宗儒自宰相罷免年七十餘益曰此吾為東

府所選進士也聞者憐益之困後遷禮部尚書致  
 仕卒

閒庭草色能留馬當路楊花不避人句笳簫漢恩

繁旌旗邊色故句馬汗凍成霜句

### 耿偉

許州書情寄韓張二舍人云謫宦軍城老更悲近  
 來頻夢到丹墀乍燃乍滅心中火惟鑷惟多鬢上  
 絲繞院綠苔聞鴈處滿庭黃葉閉門時故人高步



雲衢上肯念前程杳未期  
黃葉關門欲對人高處  
贈朗公云來自西天竺持經奉紫薇  
年深梵語變行苦俗人歸  
月上安禪久苔生出院稀  
梁間有馴鴿不去爲無機

秋日云返照入閭巷  
憂來與誰語古道無人行  
秋風動禾黍

書情逢故人云因君知此事  
流恨已忘機客久多人識  
年高衆病歸連雲潮色遠  
度雪鴈聲稀又說

家林盡悽傷淚滿衣

贈張將軍云寥落邊城暮  
重門返照間鼓鼙驚雨  
暗士馬過秋閒慣守臨邊郡  
曾營近海山關西舊業在  
夜夜夢中還

醜暢當云同遊漆沮後已  
是十年餘幾度曾相夢  
何時定得書月高城影盡  
霜重柳條疎且對樽中

酒千般想未如

書情逢故人以下姚合取爲極玄集

偉寶應元年進士爲左拾遺  
詩有家貧僮僕慢官

罷友朋疎世多傳之

盧綸

長安春望云東風吹雨過青山却望千門草色閒  
家在夢中何日到春來江上幾人還川原繚繞浮  
雲外宮闕參差落照間誰念爲儒多失意獨將衰  
鬢客秦關

綸德宗時爲戶部郎中舅韋渠牟表其才召見禁  
中帝旨所作輒爲賡和異日問渠牟盧綸李益何

在答曰綸從渾瑊在河中驛召之會卒文宗尤愛  
其詩問宰相盧綸文章幾何亦有子否李德裕對  
綸四子皆擢進士第在臺閣帝遣人悉索家笥得  
詩五百篇以聞

得嶺南故人書云瘴海寄雙魚中宵達我牖兩行  
燈下淚一紙嶺南書地說炎蒸極人稱老病餘殷  
勤祝賈誼莫共酒盃疎

題興善寺後池云隔窓棲白鶴似與鏡湖鄰月照

何年樹花逢幾度人岸沙青有路苔徑綠無塵願  
得容依止僧中老此身

送李端云故關衰草遍離別自堪悲路出寒雲外  
人歸暮雪時少孤爲客慣多難識君遲掩淚空相  
向風塵何所期

得感友人以下  
姚合取爲極玄集

### 韓翃

侯希逸鎮淄青翃爲從事罷府閒居十年李勉鎮  
夷門辟爲幕屬時已遲暮不得意多家居一日夜

將半客叩門急賀曰員外除駕部郎中知制誥翃  
愕然曰誤矣客曰邸報制誥闕人中書兩進名不  
從又請之曰與韓翃時有同姓名者爲江淮刺史  
又具二人同進御批曰春城無處不飛花寒食東  
風御柳斜日暮漢宮傳蠟燭青烟散入五侯家又  
批曰與此韓翃客曰此員外詩耶翃曰是也是不  
誤時建中初也

南部新書云昇平公主宅卽席李端擅塲送王相

之幽鎮翊擅場送劉相巡江淮錢起擅場

德宗西幸有神智驄如意騮二馬謂之功臣一日  
有進瑞鞭者上曰朕有二駿今得此可爲三絕因  
吟翊觀調馬詩云鴛鴦赭目齒新齊曉日花間放  
碧蹄玉勒乍迴初噴沫金鞭欲下不成嘶高仲武  
云韓員外意放經史興致繁富一篇一韻朝野珍  
之多士之選也至如星河秋一雁砧杵夜千家又  
客衣筒布細山舍荔枝繁又疎簾看雪捲深戶映

花關方之前載則芙蓉出水未足多也其比興深  
於劉員外筋節減於皇甫冉也

題薦福衡岳禪師房云春城乞食還高論此中間  
僧臘階前樹禪心江上山疎簾看雪捲深戶映花  
關晚送門人去鐘聲杳靄間

世傳翊有寵姬柳氏翊成名從辟淄青置之都下  
數歲寄詩曰章臺柳顏色青青今在否縱使長條  
似舊垂也應攀折他人手柳答曰楊柳枝芳菲節

可恨年年增離別一葉隨風忽報秋縱使君來豈  
堪折後果爲蕃將沙吒利所劫翊會入中書道逢  
之謂永訣矣是日臨淄大校置酒疑翊不樂具告  
之有虞候將許俊以義烈自許卽詐取得之以授  
韓希逸聞之曰似我往日所爲也俊復能之翊後  
爲夷門幕府後生共目爲惡詩輕之

錢起

高仲武云詩格清奇理致清淡粵從登第挺冠詞

林文宗右丞許以高格右丞沒後員外爲雄革齊  
宋之浮游削梁陳之靡曼迥然獨立莫之與京且  
如鳥道過疎雨人家殘夕陽又牛羊上山少烟火  
隔林深又長樂鐘聲花外盡龍池柳色雨中深皆  
特出意表標準古今又窮達戀明主耕桑亦近郊  
禮義克全忠孝兼著足以弘長名流爲後楷式  
送僧歸日東云上國隨緣去東途若夢行浮天滄  
海遠去世法舟輕水月通禪觀魚龍聽梵聲唯憐

全唐詩話 卷二十一  
慧燈影萬里眼中明

送僧自吳遊蜀云隨緣忽西去何日返東林世路  
無期別空門不住心人烟一飯少山雪獨行深天  
外猿聲夜誰聞清梵音

送征雁云秋空萬里靜嘹唳獨南征風急翻霜冷  
雲開見月驚塞長憐去翼影滅有餘聲悵望遙天  
外鄉愁滿目生

裴迪書齋望月云夜來詩酒興月上謝公樓影開

重關靜寒生獨樹秋鵲驚隨葉散螢遠入烟流今  
夕逢天末清暉幾處愁

送彈琴李長史赴洪州云抱琴爲傲吏孤棹復南  
行幾度秋江水皆添白雪聲佳期來客夢幽興緩  
王程佐牧無勞問心和政自平

以上四章姚合  
取爲極玄集

贈闕下裴舍人云二月黃鶯飛上林春城紫禁曉  
陰陰長樂鐘聲花外盡龍池柳色雨中深陽和不  
改窮途恨霄漢常懷捧日心獻賦十年猶未遇羞

將白髮對華簪

題玉山村叟壁云谷口好泉石居人能陸沉牛羊  
上山少烟火隔林深一徑入溪色數家連竹陰藏  
虹辭晚雨驚隼落殘禽涉趣皆流目將歸必在林  
却思黃綬事辜負紫芝心

司空曙

酬張芬有赦後見贈云紫鳳朝銜五色書陽春忽  
報網羅除已將心變寒灰後豈料光生腐草餘建

水風烟收客淚杜陵花竹夢郊居勞君故有詩相  
贈欲報瓊瑤恨不如

經廢寶光寺云黃葉前朝寺無僧寒殿開池晴龜  
出曝松暝鶴飛迴古砌碑橫草陰廊畫雜苔禪宮  
亦消歇塵世轉堪哀

喜外弟盧綸見宿云靜夜四無隣荒居舊業貧雨  
中黃葉樹燈下白頭人以我獨沉久愧君相見頻  
平生自有分況是蔡家親

崔峒

江上書懷云骨肉天涯別江山日落時淚流襟上  
血髮白鏡中絲胡越書難到存亡夢豈知登高回  
首罷形影自相隨

喜逢妻弟鄭損因送入京詩云亂後自孤征相逢  
喜復驚爲經多載別欲問小時名對酒悲前事論  
文畏後生遙知盈卷軸紙貴在江城

高仲武云峒詩文彩煥發意思雅淡如清磬度山  
翠閒雲來竹房又流水聲中視公事寒山影裏見  
人家此亦披沙鍊金時時見寶也

峒登進士第爲拾遺入爲集賢學士後終州刺史  
或云終玄武令文藝傳云終右補闕峒寄李明府  
云松堂寂寂對烟霞五柳門前集晚鴉流水聲中  
視公事寒山影裏見人家觀風共美新爲政計日  
還應更觸邪可惜陶潛無限酒不逢籬菊正開花

李端



贈郭駙馬詩云

郭令公子駿尚昇平公主此詩席上成

青春都尉最

風流二十功成便拜侯金距鬪雞過上苑玉鞭騎

馬出長楸薰香荀令偏憐少傅粉何郎不解愁日

暮吹簫楊柳陌路人遙指鳳凰樓

又云方塘似鏡草芊芊初月如鈎未上弦新開金

埒看調馬舊賜銅山許鑄錢楊柳入樓吹玉笛芙

蓉出水妬花鈿今朝都尉如相顧願脫長裾學少

年

蜀路有飛泉亭中詩板百餘篇後薛能佐李福於蜀道過此題云賈掾曾空去題詩豈易哉悉去諸板惟留端巫山高一篇而已

端賦巫山高云巫山十二峰皆在碧虛中回合雲藏日霏微雨帶風猿聲寒過水樹色暮連空愁向高唐望秋風見楚宮

茂陵山行陪韋金部云宿雨朝來歇空山天氣清盤雲雙鶴下隔水一蟬鳴古道黃花落平蕪赤草

生茂陵雖有病猶得伴君行  
蕪城懷古云風吹城上樹草沒邊城路城裏月明  
時精靈自去來

冷朝陽

潞州節度薛嵩有青衣善彈阮咸琴手紋隱起如  
紅線因以名之一日辭去朝陽爲詞曰採菱歌怨  
木蘭舟送客魂銷百尺樓還似洛妃乘霧去碧天  
無際水東流

竇叔向

叔向字遺直京兆人代宗時常袞爲相用爲左拾  
遺內供奉及貶亦出爲溧水令四子登第群以處  
士隱毗陵韋夏卿薦之朝德宗擢爲左拾遺代武  
元衡爲中丞薦呂溫羊士諤爲御史李吉甫以二  
人躁險持不下群怨吉甫伺吉甫陰事幾爲憲宗  
所誅群與兄常牟弟庠鞏皆爲郎工詞章爲聯珠  
集傳於時義取昆弟若五星然

叔向寒食賜恩火云恩光及小臣華燭忽驚春電  
影隨中使星輝拂路人幸因榆柳暖一照草茅貧  
端午日恩賜百索云仙官長命縷端午降殊私事  
盛蛟龍見恩深犬馬知餘生儻可續終冀答明時

竇常

常任武陵寒食日次松滋渡先寄劉員外云杏花  
榆莢曉風前雲際離離上峽船江轉數程淹驛騎  
楚曾三戶少人烟看春又遇清明節筭老重經癸

巳年幸得柱山當郡舍在朝常詠卜居篇

常乃叔向之子

竇鞏

代隣叟云年來七十罷耕桑就暖支羸強下牀滿  
眼兒孫身外事閒梳白髮對殘陽

寄南遊弟兄云書來未報幾時還知在三湘五嶺  
間獨立衡門秋水闊寒鴉飛去日銜山

常建

清晨入古寺初日照高林竹徑通幽處禪房花木

深山光悅鳥性潭影空人心萬籟此都寂但餘鐘

磬音 題破山後禪院

歐陽永叔云吾嘗愛建竹徑通幽處禪房花木深

欲效其語作一聯竟不可得始知造意者難為工

也

丹陽殷璠撰河岳英靈集首列建詩愛其山光悅

鳥性潭影空人心

殷璠云高才而無貴位誠哉是言也曩劉禎死於

文學左思終於記室鮑昭卒於參軍今常建亦淪

於一尉悲夫建詩似初發通莊却尋野逕百里之

外方歸大道所以其旨遠其興僻佳句輒來惟論

意表至如松際露明月清光猶為君又山光悅鳥

性潭影空人心此例數十句並可稱為警策一篇

盡善者戰餘落日黃軍敗鼓聲死今與山鬼隣殘

兵哭遼水思既邈古詞又警絕潘岳雖云能敘悲

怨未見如此章句也

弔王將軍墓云嫫姚北伐時深入疆千里戰餘落日黃軍敗鼓聲死常聞漢飛將可奪單于壘今與山鬼隣殘兵哭遼水

李約

汧公勉之子也爲兵部外郎與主客外郎張諗同官每單牀靜言達旦不寐贈韋徵君沉詩曰我有心中事不向韋三說秋夜洛陽城明月照張八觀祈雨云桑條無葉土生烟簫管迎龍水廟前朱

門幾處耽歌舞猶恐春陰咽管絃

從軍行云看圖閒教陣畫地靜論邊烏壘天西戍鷹窠塞上川路長唯筭月書遠每題年無復生還望翻思未別前又候火起鷓城塵沙擁戰聲游軍藏虜幟降騎說蕃情霜落滌池淺秋深太白明嫫姚方虎視不覺說添兵

約雅度簡遠有山林之致在潤州得古鐵一片擊之清越又養一猿名山公月夜泛江登金山鼓琴

猿必嘯和曾佐庶人李錡幕至金陵屢讚招隱寺  
標致一日庶人宴寺中明日謂曰子嘗稱招隱標  
致昨日遊宴何殊州中約曰某所賞者疎野耳若  
遠山將翠幕遮古松用綵物裹羶腥浣鹿跑泉音  
樂亂山鳥聲此則實不如在叔父大廳也性又嗜  
茶能白煎曰茶須緩火炙活火煎活火炭有焰者  
曾奉使行陝州峽石縣東愛渠水清流旬日忘發  
梁武造寺令蕭子雲飛白大書一蕭字約自江淮  
竭產致歸洛中扁於小亭號曰蕭齋

陳通方

通方登貞元進士第與王播同年播年五十六通  
方甚少因期集撫播背曰王老奉贈一第言其日  
暮途遠及第同贈官也播恨之後通方丁家難辛  
苦萬狀播捷三科爲正郎判鹽鐵通方窮悴求助  
不甚給之時李虛中爲副使通方以詩求爲汲引  
云應念路傍憔悴翼昔年喬木幸同遷播不得已

薦為江西院官

楊炎

元載末年納薛瑤英為姬處以金絲帳却塵褥衣  
 以龍銷衣載以瑤英體輕不勝重衣於異國求此  
 服也惟賈至與炎雅與載善往往時見其歌舞至  
 贈詩曰舞怯銖衣重笑疑桃臉開方知漢成帝空  
 築避風臺炎亦贈歌云雪面淡眉天上女鳳簫鸞  
 翅欲飛去玉山翹翠步無塵楚腰如柳不勝春

炎字公南常袞長於除書炎善德音自開元後言  
 制詔者稱常楊元載與炎同郡炎又元出也故擢  
 炎禮部侍郎德宗時位宰相

裴度

公赴敵淮西題名華嶽廟之闕門大順中戶部侍  
 郎司空圖以一絕紀之曰嶽前大隊赴淮西從此  
 中原息戰輦石闕莫教苔蘚上分明認取晉公題  
 樂天求馬裴贈以馬因戲云君若有心求逸足我

還留意在名姝引妾換馬之事樂天答曰安石風  
流無奈何欲將赤驥換青娥不辭便送東山去臨  
老何人與唱歌

中書卽事云有意効承平無功答聖明灰心緣忍  
事霜髮爲論兵道直身還在恩深命轉輕鹽梅非  
擬議葵藿是平生白日長懸照蒼蠅謾發聲嵩陽  
舊田地終使謝歸耕

韓愈

喚起窓全曙催歸日未西無心花裏鳥更與盡情  
啼乃二禽名也喚起聲如絡緯圓轉清亮偏鳴於  
春曉江南謂之春喚催歸子規也

元和十二年裴度宣慰淮西奏公行軍司馬有從  
軍洎途中諸篇其間次潼關寄張十二使君詩云  
荆山已去華山來日照潼關四扇開刺史莫辭迎  
候遠相公新破蔡州廻又次潼關上都統相公云  
暫辭堂印執兵權盡管諸軍破賊年冠蓋相望催



入相待將功德格皇天又桃林夜賀晉公云西來  
騎火照山紅夜宿桃林臘月中手把命珪兼相印  
一時重疊賞元功數篇皆有奧旨元濟平遷刑部  
侍郎

十四年正月表乞燒棄佛骨疏入貶潮州刺史有  
次藍關示姪孫湘詩云一封朝奏九重天夕貶潮  
陽路八千欲爲聖明除弊事豈將衰朽計殘年雲  
橫秦嶺家何在雪擁藍關馬不前知汝遠來應有

意好收吾骨瘴江邊是歲十月量移袁州刺史酬  
張韶州詩云明時遠逐事何如遇赦移官罪未除  
北望詎令隨塞鴈南遷纔免葬江魚將經貴郡須  
留客先惠高文謝起予暫欲繫舟韶石下上賓虞  
舜整冠裾

又留別張使君云來往再逢梅柳新別離一醉綺  
羅春久欽江總文才妙自嘆虞翻骨相屯鳴笛急  
吹催落日清歌緩送感行人已知奏課當徵拜那

復淹留詠白蘋

張籍

籍宿江上詩云楚驛南渡口夜深來客稀月明見  
潮上江靜覺鷗飛旅次今已遠此行殊未歸離家  
久無信又聽搗寒衣或云劉長卿餘干旅舍云搖  
落暮天迥丹楓霜葉稀孤城向水閉獨鳥背人飛  
渡口月初上隣家漁未歸鄉心正欲絕何處搗寒  
衣槩相類也

籍字文昌和州人歷水部外郎終主客郎中

蕃漢斷消息死生長別離

句

常於送人處憶得別

家時

句

流光暫出還入地使我年少不須臾

句

右

張爲取作主客圖

送裴相公鎮太原云盛德雄遠近知功高先乞

守藩籬銜恩暫遣分龍節署勅還同在鳳池天子

親臨樓上送朝官齊出道邊辭明年塞北諸蕃落

應起生祠請立碑

白樂天讀籍詩集云張公何爲者業文三十春尤  
攻樂府詞舉代少其倫姚合讀籍詩有詩云妙絕  
江南曲淒涼怨女詩古風無敵于新語是人知

李道昌

道昌唐大曆十三年爲蘇州觀察使一日郡城外  
虎丘山有鬼題詩二首隱于石壁之上云青松多  
悲風蕭蕭聲且哀南山接幽隴幽隴空崔嵬白日  
徒昭昭不照長夜臺雖知生者樂魂魄安能迴况

復念所親慟哭心肝摧慟哭更何言哀哉復哀哉  
又曰神仙不可學形化空遊魂白日非我朝青松  
爲我門雖復復隔幽顯猶知念子孫何以遣悲惋萬  
物歸其根寄語世上人莫厭臨芳樽莊生問枯骨  
王樂成虛言道昌異其事遂具奏聞准勅令致祭  
道昌爲其文曰嗚呼萬古丘陵化無再出君若何  
人能閒詩筆何代而亡誰人子姪曾作何官是誰  
仙室寂寞夜臺悲乎白日不向紙上石中隱出桃

源三月深草垂楊黃鶯百轉猿聲斷腸不題姓字  
寧辨賢良嗚呼哀哉嘆昔先賢空傳經史終無再  
還青松嶺上嵯峨碧山大唐正業已記詩言痛復  
痛兮何處寘悲復悲兮萬古墳能作詩兮動天地  
聲悲怨兮淚霑巾感我皇兮列清酌願當生兮事  
明君是時祭後經數日再有詩一絕于石云幽冥  
雖異路平昔忝攻文欲知潛昧處山北兩孤墳後  
於寺山之北果有二墳極高大荆榛叢茂詢諸耆  
老竟不知何姓氏至今猶存皮日休和云念爾風  
雅魂幽咽能攻文空令傷魂鳥啼破山邊墳  
陸龜蒙和云靈氣猶不死尚能成綺文如何孤窆  
裏猶自讀三墳

陸暢

暢字達夫吳郡人韋臯雅所厚禮天寶時李白爲  
蜀道難以斥嚴武暢更爲蜀道易以美臯  
又經崔諫議林亭云蟬噪入雲樹風開無主花

初爲江西王仲舒從事拂衣去後遇雲陽公主下  
降百僚舉暢爲僮相詩皆頃刻而成詠簾曰勞將  
素手捲蝦鬚瓊室流光更綴珠玉漏報來過夜半  
可堪潘岳立踟躕詠竹帳曰碧玉爲竿丁字成鴛  
鴦綉帶短長馨強遮天上花顏色不隔雲中笑語  
聲

詔作催粧五言曰雲陽公主貴出嫁五侯家天母  
親調粉日兄憐賜花催鋪白子帳待障七香車借

問粧成未東方欲曉霞內人以其吳音捷才以詩  
嘲之云十二層樓倚翠空鳳鸞相對立梧桐雙成

走報監門衛莫使吳歛入漢宮

或曰宋若蘭姊妹作

陸酬曰

粉面仙郎選尚朝偶逢秦女學吹簫雖教翡翠聞  
王母不奈烏鳶噪鵲橋六宮大哈別賜宮錦楞伽  
餅唾盂各一

暢謁韋臯作蜀道易詩云蜀道易易於履平地臯  
大喜臯薨朝廷欲繩其旣往之事復閱先進兵器

上皆刻定秦二字不相與者皆造成罪名暢上疏  
理之曰臣在蜀日見造所進兵器定秦者匠名也  
由此得釋段成式曰暢江東人語多差誤人以爲  
劇語初娶董溪女每旦婢進澡豆暢輒沃水服之  
或曰君爲貴門女壻幾多樂事陸暢曰貴門苦禮  
法婢子食辣麩殆不可過

李翱

翱在潭州席上有舞柘枝者顏色憂悴殷堯藩侍

御當筵贈詩曰姑蘇太守青娥女流落長沙舞柘  
枝滿座繡衣皆不識可憐紅臉淚雙垂翱詰其事  
乃姑蘇臺韋中丞愛姬所生之女夏卿之裔  
正卿之姪曰妾

以昆弟夭折委身樂部恥辱先人言訖涕咽情不  
能堪亞相爲之吁嘆且曰吾韋族姻舊速命更其  
舞衣飾以桂襦延與韓夫人相見夫人吏  
部之女顧其言

語清楚宛有冠蓋風儀遂於賓榻中選士而嫁之  
舒元興侍郎聞之自京馳詩曰湘江舞罷忽成悲

便脫蠻靴出絳帷誰是蔡邕琴酒客魏公懷舊嫁  
文姬

李翱薦孟郊於張建封云茲有平昌孟郊正士也  
伏聞執事舊知之郊爲五言詩自前漢李都尉蘇  
屬國及建安諸子南朝二謝郊能兼其體而有之  
李觀薦郊於梁肅補闕書曰郊之五言詩其有高  
處在古無上其有平處下顧兩謝韓送郊詩曰作  
詩三百首杳默咸池音彼三子皆知言也豈欺天

下之人哉郊窮餓不得安養其親周天下無所遇  
作詩曰食齋腸亦苦強歌聲無歡出門卽有礙誰  
爲天地寬其窮也甚矣凡聖人奇士自以所負不  
苟合於世是以雖見之難得而知也見而不能知  
其賢如勿見而已矣知其賢而不能用如勿知其  
賢而已矣用而不能盡其才如勿用而已矣盡其  
才而容讒人之所間者如勿盡才而已矣故見賢  
而能知知而能用用而能盡其才而不容讒人之

所間者天下一人而已矣郊下第詩曰棄置復棄  
置情如刀劒傷又再下第詩曰一夕九起嗟夢知  
不到家兩度長安陌空將淚見花而後及第有詩  
曰昔日齷齪不足嗟今朝曠蕩恩無涯青春得意  
馬蹄疾一日看盡長安花一日之間花卽看盡何  
其速也果不達

劉義

劉義節士也少放肆爲俠曾因酒殺人亡命會赦

出更折節讀書能爲歌詩然恃故時所負不能俛  
仰貴人聞韓愈接天下士步謁之作冰柱雪車二  
詩出盧孟右樊宗師見爲獨拜後以爭語不能下  
賓客因持愈金數斤去曰此諛墓中人得耳不若  
與劉君爲壽愈不能止歸齊魯不知所終

楊巨源

楊巨源以三刀夢益州一箭取遼城得名故樂天  
詩云早聞一箭取遼城相識雖深有故情清句三



朝誰是敵白鬚四海半爲兄貧家薙草時時入瘦  
馬尋花處處行不用更教詩過好折君官職是空  
名巨源後拜省郎樂天復以詩賀云文昌新入有  
光輝紫界宮牆白粉闈曉日雞人傳漏箭春風侍  
女護朝衣雪飄歌句高難和鶴拂烟霄老慣飛官  
職聲名俱入手近來詩客似君稀

巨源字景山大中時爲河中少尹

何事慰朝夕不踰詩酒情山河空道路蕃漢共刀

兵禮樂新朝市園林舊弟兄向風一點淚寒晚暮

江平右張爲取作主客圖

歐陽詹

歐陽詹字行周泉州人初見拔於常袞後見知於  
退之元賓終於四門助教李貽孫序其文曰君之  
文周詳切於情故敘事重複宜其掌代文柄以變  
風雅一命而卒天其絕乎子賈早死孫澥  
途中寄太原所思詩曰驅馬漸覺遠迴頭長路塵

高城已不見況復城中人去意自未甘居情諒猶  
辛萬里東北晉千里西南秦一履不出門一車無  
停輪流萍與匏繫早晚期相親或曰詹遊大原悅  
一妓將別約至都相迎故有早晚期相親之句妓  
思之不已得疾且甚乃刃其髻藏之謂女弟曰歐  
陽生至可以爲信又作詩曰自從別後減容光半  
是思郎半恨郎欲識舊來雲髻樣爲奴開取縷金  
箱絕筆而逝及詹至如其言示之詹啓函一慟而

卒孟簡賦詩哭之序云穆玄道訪予常嘆其事玄  
道頗惜之

袁高

禹貢通遠俗所圖在安人后王失其本職吏不敢  
陳亦有奸佞者因茲欲求伸動生千金費日使萬  
姓貧我來顧渚源得與茶事親昨輟耕農來採採  
實苦辛一夫且當役盡室皆同臻捫葛上欹壁蓬  
頭入荒榛終朝不盈掬手足皆皴鱗悲嗟遍空山

草木爲不春陰嶺牙未吐使者牒已頻心爭造化  
力先從銀臺筠選納無晝夜搗聲昏繼晨衆工何  
枯槁俯視彌傷神皇帝尚巡狩東郊路多堙周迴  
遶天涯所獻愈艱勤況值兵革困重茲困疲民未  
知供御餘誰合分此珍顧省忝邦守又慚復因循  
茫茫滄海間丹憤何由伸右高所賦茶山詩也案  
唐制湖州造貢茶最多謂之顧渚貢焙歲造一萬  
八千四百斤大曆後始有進奉建中二年高刺郡

進三千六百串并詩此一章刻石在貢焙故杜鴻  
漸與楊祭酒書云顧渚中山紫笋茶兩片此物但  
恨帝未得嘗實所嘆息一片上太夫人一片克昆  
弟同歡開成三年以貢不如法停刺史裴克官

閻濟美

濟美大曆九年春下第將出關獻座主張謂詩六  
韻曰蹇諤王臣直文明雅量全望爐金自躍應物  
鏡何偏南國幽沉盡東堂禮樂宣轉令游藝士更

惜至公年芳樹歡新景青雲泣暮天唯愁鳳池拜  
孤賤更誰憐謂覽之問失第之因具以實告謂深  
有遺才之歎乃曰所投六韻必展後效明年濟美  
自江東繼薦就試東都謂後主文雜文已文已過  
繼欲帖經濟美辭以不能謂曰禮闈故事亦許作  
詩續帖遂命天津橋望洛城殘雪題濟美曰新霽  
洛城端千家積雪寒未收清禁色偏向上陽殘旣  
而目勢已晚詩未就謂曰據見在將來一覽稱賞

遂唱過盧景莊謂曰前足下試蜡日祈天宗賦以  
魯丘對衛賜則子貢也乃作駟字誤矣方悔之明  
日謂曰天寒急景諸君文卷不成未可以呈宰相  
請重送納旣而索舊卷則駟字上朱點在焉易卷  
之意蓋有在也到闕謂揖濟美曰前日春間遺才  
所投六韻不敢暫忘幸副素懷矣濟美紀其事曰  
前朝公相許與定分一面不忘濟美哉

裴交泰

長門怨云自閉長門經幾秋羅衣濕盡淚還流一  
 種蛾眉明月夜南宮歌吹北宮愁范攄曰近日舉  
 場詩尤新章孝標對月云長安一夜千家月幾處  
 笙歌幾處愁有類乎裴交泰  
 裴貞元間詩人

劉竈 紀事  
作阜

章莊載竈長門怨云淚滴長門秋夜長愁心和雨  
 到昭陽淚痕不學君恩斷拭却千行更萬行

元稹

稹聞西蜀薛濤有辭辯及為監察使蜀以御使推  
 鞫難得見焉嚴司空潛知其意每遣薛往洎登翰  
 林以詩寄曰錦江滑膩蛾眉秀生得文君與薛濤  
 言語巧偷鸚鵡舌文章分得鳳凰毛紛紛辭客多  
 停筆箇箇公侯欲夢刀別後相思隔烟水菖蒲花  
 發五雲高後廉問浙東乃有劉採春自淮甸而來  
 容華莫比元贈詩曰新粧巧樣畫雙蛾謾裏常州

透額羅正面偷勻光滑笏緩行輕踏皺紋波言辭  
 雅措風流足舉止低迴秀媚多更有惱人腸斷處  
 選詞能唱望夫歌望夫歌即羅噴之曲也元云在  
 淞河七年因醉題東武其詩曰役役行人事紛紛  
 碎簿書功夫兩衙盡留滯七年餘病痛梅天發親  
 情海岸疎因循未歸得不是憶鱸魚盧侍郎簡求  
 戲曰丞相雖不為鱸魚為好鏡湖春色耳謂採春  
 也

公先娶京兆韋氏字蕙叢韋逝為詩悼之曰曾經

滄海難為水除却巫山不是雲

出本  
事傳

樂天在洛大和中積拜左丞相自越過洛以二詩  
 別樂天云君應怪我留連久我欲與君辭別難白  
 頭徒侶漸稀少明日恐君無此歡又云自識君來  
 三度別這回白盡老髭鬚戀君不去君須會知得  
 後回相見無未幾死於鄂樂天哭之曰始以詩交  
 終以詩訣茲筆相絕其今日乎

屈指貞元舊朝士幾人同見大和春感興句兒歌楊

柳葉妾拂石榴花句遠路事無限相逢唯一言月

色照榮辱長安千萬門逢白公句

白居易

張爲以居易爲廣大教化主取其讀史詩云含沙

射人影雖病人不知巧言誣人罪至死人無疑撥

蜂殺愛子掩鼻戮寵姬弘恭陷蕭望趙高謀李斯

陰德既必報陽禍豈虛施人事雖可罔天道終難

欺明卽有刑辟陰卽有神祇苟免勿私喜鬼得而

誅之

又取得意減別恨半酣還遠程之句又人吏留不

得直入故山雲之句又長生不似無生理休向青

山學煉丹之句又白髮鑷不盡根在愁腸中之句

又與薛濤云峩眉山勢接雲霓欲逐劉郎此路迷

若似剡中容易到春風猶隔武陵溪

樂天不爲贊皇公所喜每寄文章李緘之一篋未

嘗開劉夢得或請之曰見詞則迴吾心矣樂天未冠以文謁顧況况覩姓名熟視曰長安米貴居大不易乃捲卷讀其芳草詩至野火燒不盡春風吹又生嘆曰吾謂斯文遂絕今復得子矣前言戲之耳

樂天賦性曠達其詩曰無事日月長不羈天地濶此曠達之詞也孟郊賦性褊狹其詩曰出門卽有礙誰謂天地寬此褊狹之詞也然則天地又何嘗

礙郊郊自礙耳

樊素善歌小蠻善舞樂天賦詩有曰櫻桃樊素口楊柳小蠻腰至於高年又賦詩曰失盡白頭伴長成紅粉娃因爲楊柳詞以託意云一樹春風萬萬枝嫩於金色軟於絲永豐東角荒園裏盡日無人屬阿誰及宣宗朝國樂唱是詞帝問永豐在何處左右具以對遂因命取永豐柳兩枝植於禁中自感上知又爲詩云一樹衰殘委泥土雙枝移種植



天庭定知此後天文裏柳宿光中見兩星洛下文  
士無不繼作韓常侍琮時爲留守亦有詩和云折  
柳歌中得翠條遠移金殿種青霄上陽宮女吞聲  
送不分先歸舞細腰盧貞和一樹依依在永豐兩  
枝飛去杳無蹤玉皇曾採人間曲應逐歌聲入九  
重示意也

全唐詩話卷之二

全唐詩話卷之三

牛僧孺

樂天夢得有除夜詩僧孺和云惜歲歲今盡少年  
應不知淒涼數流輩歡喜見孫兒暗減一身力潛  
添滿鬢絲莫愁花笑老花自幾多時

元和三年宣政殿試賢良方正能直言極諫科一  
十人登科其後僧孺李宗閔王起賈餗四人皆相  
次拜相先是白居易在翰林爲考校官後僧孺罷

全唐詩話  
相出鎮揚州居易在洛中有詩云北闕至東京風  
光十六程坐移丞相閣春入廣陵城紅旆擁雙節  
白鬚無一莖萬人開路看百吏立班迎闔外君彌  
重罇前我亦榮何須身自得將相是門生  
公始至京置琴書灞澹間先以所業謁韓文公皇  
甫員外二公披卷卷首有說樂二章未閱其詞遽  
曰且以拍板爲什麼對曰樂句二公相顧大喜曰  
期高文必矣公因謀所居二公良久曰可於客戶

坊稅一廟院公如所教二公復誨之曰某日可遊  
青龍寺薄暮而歸二公共日聯鑣至彼因大書其  
門曰韓愈皇甫湜同謁幾官先輩不遇翌日輦轂  
名士咸往觀焉奇章之名由是赫然矣或云僧孺  
登筭與同輩登政事堂宰相曰掃廳奉候

樂天求箏於維揚僧孺先有詩曰但愁封寄去魔  
物或驚禪樂天云會教魔女弄不動是禪心樂天  
云思黯自誇前後服鍾乳三千兩而歌舞之妓甚

多乃謔予衰老故答思黯詩云鍾乳三千兩金釵  
十二行妬他心似火欺我鬢如霜慰老資歌笑銷  
愁仰酒漿眼看狂不得狂得且須狂奇章又有詩  
云不是道公狂不得恨公逢我不教狂

李紳

紳初以古風求知於呂溫溫見齊煦誦憫農詩曰  
春種一粒粟秋收萬顆子四海無閒田農夫猶餓  
死鋤禾日當午汗滴禾下土誰知盤中飧粒粒皆

辛苦又曰此人必爲卿相果如其言

紳字公垂中書令敬玄孫號短李穆宗召爲翰林  
學士與李德裕元稹同時號三俊武宗時爲相居  
位四年出鎮淮南卒

憶夜直金鑾奉詔承旨詩云月當銀漢玉繩低深  
聽簫韶碧落齊門壓紫垣高綺樹閣連青瑣近丹  
梯墨宣外渥催飛詔草定新恩促換題明日獨歸  
花路近可憐人世隔雲泥

劉禹錫

長慶中元微之夢得韋楚客同會樂天舍論南朝  
興廢各賦金陵懷古詩劉滿引一杯飲已卽成曰  
王濬樓船下益州金陵王氣黯然收千尋鐵鎖沉  
江底一片降幡出石頭人世幾回傷往事山形依  
舊枕寒流而今四海爲家日故壘蕭蕭蘆荻秋白  
公覽詩曰四人探驪龍子先獲珠所餘鱗爪何用  
耶於是罷唱

元和十年自朗州召至京戲贈看花君子云紫陌  
紅塵拂面來無人不道看花回玄都觀裏桃千樹  
盡是劉郎去後栽

再遊玄都觀絕句并序云余貞元二十一年爲屯  
田郎時此觀未有花是歲出牧連州貶郎州司馬  
居十年召至京師人人皆言有道士手植僊桃滿  
觀如紅霞遂有前篇以志一時之事旋又出牧今  
十有四年復爲主客郎中重遊玄都蕩然無復一

全唐詩話 四  
樹惟兔葵燕麥動搖春風耳因再題二十八字以  
俟後遊時太和二年三月也詩云百畝中庭半是  
苔桃花淨盡菜花開種桃道士歸何處前度劉郎  
今又來

禹錫嘗對賓友每吟張博士籍詩云藥酒欲開期  
好客朝衣暫脫見閑身對花木則吟王右丞詩云  
興闌鳴鳥換坐久落花多白二十二好余秋水詠  
云東屯滄海濶南瀼洞庭寬余自知不及韋蘇州

春潮帶雨晚來急野渡無人舟自橫嘗過洞庭雖  
爲一篇思杜員外落句云年去年來洞庭上白蘋  
愁殺白頭人鄙夫之言有愧於杜公也楊茂卿按  
書過華山詩曰河勢崑崙遠山形菡萏秋此實爲  
佳句

白樂天任杭州刺史携數妓還洛陽後却還錢塘  
故禹錫戲答云其那錢塘蘇小小憶君淚點石榴  
裙沈存中曰禹錫霓裳羽衣曲云三鄉陌上望僊

山歸作霓裳羽衣曲又王建詩云聽風聽雨作霓裳樂天詩注云開元中西涼府節度使楊敬述造鄭愚津陽門詩注云葉法善嘗引上入月宮聞仙樂及上歸但記其半遂於笛中寫之會西涼府都督楊敬述進婆羅門曲與其聲調相符遂以月中所聞爲散序用敬述所進爲其腔而名霓裳羽衣曲說各不同今蒲州逍遙樓楣上有唐人橫書類梵字相傳是霓裳譜字訓不通莫知是非或謂今

燕部有獻僊音曲乃其遺聲然霓裳本謂之道調法曲今獻僊音乃小石調耳未知孰是

山圍故國周遭在潮打空城寂寞迴淮水東邊舊時月夜深還過女墻來樂天掉頭苦吟歎賞良久曰石頭詩云潮打空城寂寞迴吾知後之詩人不復措辭矣

禹錫金陵五題自序云

禹錫字夢得附叔文擢度支員外郎人不敢斥其名號二王劉柳憲宗立禹錫貶連州未至斥朗州

司馬作竹枝詞武元衡初不為宗元所喜自中丞  
 下除右庶子及是執政禹錫久落魄乃作問大鈞  
 謫九年等賦又敘張九齡事為詩欲感諷久之召  
 還宰相欲任南省郎乃作玄都觀看花君子詩當  
 路不喜出為播州易連州徙夔州由知州刺史入  
 為主客郎中復作遊玄都觀詩有兔葵燕麥之語  
 聞者益薄其行俄分司東都裴度薦為集賢學士  
 度罷出刺蘇州徙汝同一州會昌朝檢校禮部尚

書李

故國思如此若為天外心

寄白公句

湖上收宿雨

句故

人日已遠窗下塵滿琴坐對一樽酒恨多無力斟

幕疎螢色迴露重月華深萬境與羣籟此時情豈

任

無題

禪思何妨在玉琴真僧不見聽時心秋堂境

寂夜將半雲去蒼梧湘水深

聽琴

右張為取作主客

圖

夢得曰柳八駁韓十八平淮西碑云左發右粥何

如我平淮西雅云仰父俯子韓碑兼有帽子使我  
爲之便說用兵伐叛矣夢得曰韓碑柳雅余爲詩  
云城中晨雞喔喔鳴城中鼓角聲和平美愬之入  
蔡城也須臾之間賊無覺者又落句云始於元和  
十二載重見天寶昇平時以見平淮之年

陳潤

送駱徵君云野人膺辟命溪上掩柴扉黃卷猶將  
去青山豈更歸馬留苔蘚迹人脫薜蘿衣他日相

思處天邊望少微

潤大曆間人終坊州郿城縣令樂天之外祖也丈  
夫不感恩感恩寧有淚心頭感恩血一滴染天地  
右張爲取作主客圖

賈島

島字浪先范陽人初爲浮屠名無本能詩獨變格  
入僻以矯艷於元白來洛陽韓愈教爲文去浮屠  
舉進士終普州司戶島久不第吟病蟬之句以刺



公卿或奏鳥與平曾等爲十惡逐之詩曰病蟬飛  
不得向我掌中行折翼猶能薄酸吟尚極清露華  
疑在腹塵點誤侵睛黃雀并烏鳥俱懷害爾情大  
中末授遂州長江簿初之任屆東川守者厚禮之  
鳥獻感恩詩曰匏革奏終非獨樂軍城未曉啓重  
門何時却入三台貴此日空知八座尊羅綺舞間  
收雨點貔貅闌外卷雲根逐遷屬吏隨賓列撥掉  
扁舟不忘恩自長江遷普州司倉方干自鏡湖寄

詩曰亂山重復疊何處訪先生豈料多才者空垂  
不第名閒曹猶得醉薄俸亦勝耕莫問吟詩苦年  
年芳草平鳥至老無子因啖牛肉得疾終於傳舍  
鳥詩有警句韓退之喜之其渡桑乾詩曰客舍并  
州三十霜歸心日夜憶咸陽無端更渡桑乾水却  
望并州是故鄉

又赴長江道中詩曰策杖馳山驛逢人問梓州長  
江何日到行客替生愁晉公度初立第於街西興

化里鑿池種竹起臺榭島方下第或以爲執政惡之故不在選怨憤題詩曰破却千家作一池不栽桃李種薔薇薔薇花落秋風起荆棘滿庭君始知皆惡其不遜島爲僧時洛陽令不許僧午後出寺島有詩云不如牛與羊猶得日暮歸韓愈惜其才俾反俗應舉貽其詩云孟郊死葬北邙山日月星辰頓覺閒天恐文章中斷絕再生賈島在人間由是振名

或曰非退之詩

題杜司戶亭子云狀頭枕是溪邊石井底泉通竹下池宿客未眠過夜半獨聞山雨到來時

題李欵幽居云閒居少隣並草徑入荒村鳥宿池中樹僧敲月下門過橋分野色移石動雲根暫去還來此幽期不負言

哭孟郊云身死聲名在  
多應萬古傳寡妻無子息  
破宅帶林泉塚近登山道  
詩隨過海船故人相弔  
處斜日下寒天

夜半長安雨燈前越客吟贈吳處士句島嶼夏雲起汀

洲芳草深句秋風吹渭水落葉滿長安句山鍾夜

渡空江水汀月寒生古石樓句舊國別多日故人

無少年句

李正封

唐文皇好詩大和中賞牡丹上謂陳修巳曰今京

邑人傳牡丹詩誰為首修巳對曰中書舍人李正

封詩天香夜染衣國色朝酣酒時楊妃侍上曰粧

臺前宜飲以一紫金盞酒則正封之詩見矣

退之正封從軍有晚秋郾城聯句詩正封云從軍

古云樂談笑青油幕燈明夜觀碁月暗秋城柝遂

為警策

正封字中護終監察御史

崔護

護字殷功貞元十二年登第終嶺南節度使

沈存中云唐人以詩主人物故雖小詩莫不極工

而後已所謂旬鍛月鍊者信非虛言小說護題城南詩其始曰去年今日此門中人面桃花相映紅人面不知何處去桃花依舊笑春風後以其意未全語未工改第三句曰人面祇今何處去至今所傳有此兩本惟本事詩作祇今何處在唐人作詩大率如此雖有兩今字不恤也取語意爲主耳後人以其有兩今字故多行前篇

筆談

張又新

又新字孔昭薦之子附逢吉罷貶汀州刺史又附李訓訓死復坐貶終左司郎中

時號又新張三頭謂進士狀頭宏詞敕頭京兆解頭又新嘗作廣陵從事有佐酒妓每致情焉後二十年罷江南郡舟道廣陵適李紳鎮淮南又新方懼其讐已而又遇風漂沒二子紳憫然復書曰端溪不讓之辭愚罔懷怨荆浦沉淪之事鄙實憫然宴遇殊厚前所謂酒妓者猶在席又新以指染酒

卽席爲詞曰雲雨分飛二十年當時求夢不曾眠  
今來頭白重相見還上襄陽玳瑁筵李卽命妓歌  
以送酒

柳公權

公權武宗朝在內庭上嘗怒一宮嬪久之旣而復  
召謂公權曰朕怪此人若得學士一篇當釋然矣  
目御前蜀牋數十幅授之公權略不佇思而成一  
絕曰不分前時忤主恩已甘寂寞守長門今朝却

得君王顧重入椒房拭淚痕上大悅令宮人上前  
拜謝之

文宗時克翰林學士從幸永安宮苑中駐驛謂公  
權曰我有一喜事邊上衣賜久不及時今年二月  
給春衣訖公權前奉賀上曰可賀我以詩宮人迫  
其口進公權應聲曰去歲雖無戰今年未得歸皇  
恩何以報春日得春衣上悅激賞之

文宗夏日與諸學士聯句曰人皆苦炎熱我愛夏

日長公權續曰薰風自南來殿閣生微涼諸學士屬和帝獨諷公權兩句辭清意足不可多得乃令公權題於壁上字方圓五寸帝觀之歎曰鍾王復生無以加矣

公權字誠懸卒於太子太保

陸鴻漸

太子文學陸鴻漸名羽其先不知何許人景陵龍蓋寺僧姓陸於堤上得初生兒收育之遂以陸爲

氏及長聰俊多聞學贍詞逸談諧辯捷性嗜茶始創煎茶法至今鬻茶之家陶爲其像置於湯器之間云宜茶足利至大和中復州有一老僧云是陸僧弟子常諷其歌云不羨黃金罍不羨白玉杯不羨朝入省不羨暮入臺唯羨西江水長下金陵城下來鴻漸又撰茶經三卷行於代今爲鴻漸形因目爲茶神有售則祭之無則以釜湯沃之

章孝標

孝標元和十三年下第時輩多爲詩以刺主司獨  
孝標爲歸燕詩留獻侍郎庾承宣得詩展轉吟諷  
庾重典禮曹孝標來年登第詩云舊壘危巢泥已  
落今年故向社前歸連雲大厦無棲處更向誰家  
門戶飛孝標及第除正字東歸題杭州樟亭驛云  
樟亭驛上題詩客一半尋爲山下塵世事日隨流  
水去紅花還似白頭人初成落句云紅花真笑白  
頭人改爲還似且曰我將老成名似我芳艷詎能  
久乎及還鄉而逝或曰前有八元後有孝標皆桐  
廬人復同姓而皆不達

李紳鎮揚州請孝標賦春雪詩命題於臺盤上孝  
標唯然索筆一揮云六出飛花處處飄粘窓拂砌  
上寒條朱門到晚難盈尺盡是三軍喜氣銷

長安秋日云田家無五行水旱卜蛙聲牛犢乘春  
放兒孫候暖耕池塘烟未起桑柘雨初晴歲晚香

醪熟村村自送迎

右二詩韋莊  
又玄集取之

施肩吾

肩吾洪州人元和十年登第以洪州西山羽化之地慕其真風高蹈於此爲詩奇麗著百韻山居詩才情富贍如荷翻紫蓋搖波面蒲瑩青刀挿水湄又烟粘薜荔龍鬚軟雨壓芭蕉鳳翅垂

隋曲有疎勒鹽唐曲有突厥鹽阿鵲鹽或云關中人謂好爲鹽故肩吾詩云顛狂楚客歌成雪媚嫵吳娘笑是鹽蓋當時語也今杖鼓譜中尚有鹽杖

聲

孟簡

元和中簡將試詣日者卜之曰近東門坐卽得之矣旣入卽坐西廊迫晚忽得疾隣坐請與終篇見其姓卽東門也乃擢上第

簡字幾道德州人元和中爲戶部侍郎以贓貶後以太子賓客分司卒尤工詩尚節義

張肅遠



觀燈云十萬人家火燭光門門開處見紅妝歌鍾  
喧夜更漏暗羅綺滿街塵土香星宿別從天畔出  
蓮花不向水中芳寶釵驟馬多遺落依舊明朝在  
路傍

肅遠元和進士登第與舒元輿聲價俱美

出廣  
據言

秦雲寂寂僧還定盡日無人鹿遶牀句日暮風吹

官渡柳白鴉飛出石墻頭廢城雙雙白燕入祠堂

乳石洞玉  
女祠句右張為取作主客圖

### 許康佐

元稹酬許五康佐詩云猿啼三峽雨蟬報兩京秋  
珠玉慚新贈芝蘭忝舊遊他年問狂客須向老農  
求

康佐以中書舍人為翰林侍講學士與王起皆為  
文宗寵禮帝讀春秋至閹殺吳子餘祭問閹何人  
耶康佐以中官方強不敢對帝嬉笑後問李訓訓  
曰國君不近刑人以為輕死之道帝曰朕近刑人

多矣得不慮哉訓曰列聖知而不能遠惡而不能  
去陛下念之宗廟福也於是內謀剪除矣康佐終  
禮部尚書

張南史

陸滕宅秋雨中探韻云同人永日自相將深竹閒  
園偶辟強已被秋風教憶鱸更聞寒雨勸飛觴歸  
心莫問三江水旅服徒沾九月霜醉裏欲尋騎馬  
路蕭條幾處有垂楊

南史字季直幽州人以試叅軍避亂居揚州再召  
未赴而卒

徐凝

范攄言樂天爲杭州刺史令訪牡丹獨開元寺僧  
惠澄近於京師得之植於庭時春景方深惠澄設  
油幕覆其上會凝自富春來未識白先題詩曰此  
花南地知難種慚愧僧閒用意栽海燕解憐頻睥  
睨胡蜂未識更徘徊虛生芍藥徒勞妬羞殺玫瑰

不敢開惟有數苞紅萼在含芳直待舍人來白尋  
到寺看花乃命徐同醉而歸時張祐傍舟而至二  
生各希首薦白曰二君論文若廉藺之鬪鼠穴勝  
負在於一戰也遂試長劔倚天外賦餘霞散成綺  
詩試訖解送凝爲元祐次耳祐曰祐詩有地勢遙  
尊嶽河流側讓關又題金山寺詩曰樹影中流見  
鐘聲兩岸聞雖綦母潛云塔影挂青漢鐘聲和白  
雲此句未爲佳也凝曰美則美矣爭如老夫今古

長如白練飛一條界破青山色凝遂擅場祐歎曰  
榮辱糺紛亦何常也遂行歌而邁凝亦鼓柷而歸  
自是二生不隨鄉賦矣白又以祐宮詞四句皆數  
對未足奇也後杜牧守秋浦與祐爲詩酒友酷吟  
祐宮詞以白有非祐之論常不平之乃爲詩以高  
之曰睫在眼前人不見道於身外更何求誰人得  
似張公子千首詩輕萬戶侯又曰如何故國三千  
里虛唱歌詞滿六宮杜盛言其美者欲以苟異於

白而曲成於張也故牧又著論言近有元白者喜  
爲淫言媠語鼓扇浮囂吾恨方在下位未能以法  
治之斯亦敷佐於祐耳潘若冲郡閣雅淡云凝官  
至侍郎多吟絕句曾吟廬山瀑布膾炙人口又題  
處州縉雲山黃帝上昇之所鼎湖蓋黃帝鑄鼎處  
也有池在山頂詩云黃帝旌旗去不回空餘片石  
碧崔嵬有時風捲鼎湖浪散作晴天雨點來自後  
無敢題者凝送馬向遊蜀云遊子去咸京巴山萬

里程白雲連鳥道青壁遶猿聲雨露經泥坂烟花  
帶錦城工文人共許應記蜀中行

青山舊路在白首醉還鄉

別白  
公句

試到第三橋便入

千頃花

宿列上人房云浮生不定若蓬飄林下真僧偶見  
招覺後始知身是夢更聞寒雨滴芭蕉

### 令狐楚

楚自翰林學士拜相子綯自湖州召入翰林爲學

全唐詩話 卷三十一  
士間歲拜相渭南尉趙嘏獻詩曰鸚在卿雲水在  
壺代天才業奉訐謨榮同伊陟傳朱戶秀比王商  
入畫圖昨夜星辰回劔履前年風月滿江湖不知  
機務時多暇猶許詩家屬和無

張仲素

桂魄初生秋露微輕羅已薄未更衣銀箏夜久殷  
勤弄心怯空房不忍歸

送春辭云日日人空老年年春更歸相歡在樽酒

不用惜花飛

閨人思云愁見遊空百丈絲春風惹斷更傷離閒  
花落遍蒼苔地盡日無人誰得知

仲素字繪之建封之子憲宗以仲素段文昌爲翰  
林學士韋貫之曰學士所以備顧問不宜專取辭  
藝罷之後終中書舍人

郎士元

送張南史云雨餘深巷靜獨釣送殘春車馬雖嫌

全唐詩話 二十一  
僻鶯花不棄貧蟲聲粘戶網鼠跡印牀塵借問山  
陽會如今有幾人

士元字君胄中山人寶應中選畿縣官詔試中書  
補渭南尉歷拾遺郢州刺史

高仲武云士元員外河岳英奇人倫秀異自家刑  
國遂擁大名右丞已後與錢郎于長自丞相以下  
出使作牧二公無詩祖餞時論鄙之兩公詞體大  
約欲同就中郎公稍更閒雅近於康樂如荒城背

流水遠雁入寒林又去鳥不知倦遠帆生暮愁又  
蕭條夜靜邊風吹獨倚營門望秋月可齊衡古人  
掩映時輩又暮蟬不可聽落葉豈堪聞古人謂謝  
眺工於發端比之於今有慚沮矣

送彭將軍云雙旌漢飛將萬里授橫戈春色臨關  
盡黃雲出塞多鼓鼙悲寂寞烽火隔長河莫斷陰  
山路天驕已請和

于良史

春山夜月云春來多勝事賞翫夜忘歸掬水月在  
手弄花香滿衣興來無遠近欲去惜芳菲南望鐘  
鳴處樓臺深翠微

冬日寄李贊府云地際朝陽滿天邊宿霧收風兼  
殘雪起河帶斷水流北闕馳心極南圖尚旅遊登  
臨思不已何處得銷憂

閒居寄薛據云隱几讀黃老閒齋耳目清僻居人  
事少多病道心生雨洗山林溼鴉鳴池館晴晚來  
因廢卷行樂至西城  
高仲武云良史詩清雅工於形似如風兼殘雪起  
河帶斷水流吟之未終較然在目

舒元興

大和九年誅王涯等仇士良愈專恣文宗惡之雖  
登臨遊幸未嘗爲樂或瞠目獨語左右莫敢進問  
因題詩曰輦路生春草上林花滿枝憑高何限意  
無復侍臣知一日看牡丹或吟曰拆者如語含者

全唐詩話 二十三  
如咽俯者如愁仰者如悅吟罷方省元輿詞不覺  
歎息泣下沾衣

李賀

杜牧之序其文集云賀字長吉元和中韓吏部亦  
頗道其歌詩雲煙綿聯不足爲其態也水之迢迢  
不足爲其情也春之盎盎不足爲其和也秋之明  
潔不足爲其格也風檣陣馬不足爲其勇也瓦棺  
篆鼎不足爲其古也時花美女不足爲其色也荒

國陵殿梗莽丘隴不足爲其恨怨悲愁也鯨吐鰲  
擲牛鬼蛇神不足爲其虛荒幻誕也蓋騷之裔理  
雖不及辭或過之騷有感怨刺懟言及君臣理亂  
時有以激發人意而賀所爲無得有是賀能採尋  
前事所以深歎恨今古未嘗經道者如金銅仙人  
辭漢歌補梁庾肩吾宮體謠求取情狀離絕遠去  
筆墨畦逕間亦殊不能知之賀生二十七年死矣  
世皆曰使賀且未死少加以理奴僕命騷可也



柳宗元

雪詩云千山鳥飛絕萬徑人蹤滅孤舟蓑笠翁獨

釣寒江雪

視鄭谷亂飄僧舍之句不侔矣東坡居士云

子厚死三年愚溪無復曩時矣劉夢得聞之賦三

絕云溪水悠悠春自來草堂無主燕飛迴隔簾惟

見中庭草一樹山檣依舊開草聖數行留壞壁木

奴千樹屬隣家惟見里門通德勝殘陽寂寞出樵

車柳門竹巷依依在野草青苔日日多縱有隣人

解吹笛山陽舊侶更誰過

邵真

尋人偶題云日昃不復午落花難歸樹人生能幾

何莫厭相逢遇

真為李寶臣成德軍掌書記寶臣死其子惟岳與

田悅李正己拒命真諫之惟岳寤使真作奏復為

將吏所沮德宗詔張孝忠朱滔合兵討惟岳大敗

其眾惟岳召真議歸順悅遣扈炭來責惟岳且欲

全唐詩話 二十五  
斬真惟岳懼斬真以謝焉其後王武俊表其忠贈  
戶部尚書

李宣遠

宣遠貞元進士登第并州路作云秋日并州路黃  
榆落照間孤城吹角罷數騎射鵬還帳幙遙臨水  
牛羊自下山征人正垂淚烽火起雲間

王建

千牛仗下放朝初玉案傍邊立起居每日請來金

鳳紙殿頭無事不教書 延英引對碧衣郎江硯

宣毫各別床天子下簾親考試宮人手裏過茶湯

少年天子愛邊功親到凌烟畫閣中爲見勳臣

寫圖本長教殿裏作屏風 新調白馬怕鞭聲供

奉騎來繞殿行爲報諸王侵早起隔門催進打毬

名 羅衫葉葉繡重重金鳳銀鵝各一叢每遍舞

頭分兩向太平萬歲字當中 魚藻宮中鎖翠娥

先皇行處不曾過如今池底休鋪錦菱角雞頭積

漸多 射生宮女宿紅妝請得新弓各自張臨上  
馬時齊賜酒男兒跪拜謝君王 宮人早起笑相  
呼不識堦前掃地夫乞與金錢爭借問外頭還似  
此間無 日高殿裏有香烟萬歲聲來動九天妃  
子院中初降誕內人爭乞洗兒錢 銀燭秋光冷  
畫屏輕羅小扇撲流螢天階夜色涼如水卧看牽  
牛織女星 樹頭樹底覓殘紅一片西飛一片東  
自是桃花貪結子錯教人恨五更風 淚盡羅巾

夢不成夜深前殿按歌聲紅顏未老恩先斷斜倚  
熏籠坐到明 鴛鴦瓦上瞥然聲晝寢宮娥夢裏  
驚元是吾皇金彈子海棠花下打流鶯

建初爲渭南尉值王樞密者盡宗人之分然彼我  
不均復懷輕訪之色忽過飲樞密深憾其譏乃曰  
吾弟所作宮詞天下皆誦於口禁掖深邃何以知  
之建不能對後爲詩以贈之乃脫其禍建詩曰先  
朝行坐鎮相隨今上春宮見長時脫下御衣偏得

全唐詩話 二十七  
着進來龍馬每教騎常承密旨還家少獨對邊情  
出殿遲不是官家頻向說九重爭遣外人知

李灣 紀事作朱灣

高仲武云李灣率履貞素放情江湖郡國交辟潛  
耀不起有唐高人也詩體幽遠典用洪深因詞寫  
意窮理盡性於詠物尤工如受氣何曾異開花獨  
自遲所謂哀而不傷國風之深者也

灣爲李勉永平從事灣秋夜宴王郎中宅賦得露  
中菊云衆芳春競發寒菊露偏滋受氣何曾異開  
花獨自遲晚成猶有分欲採未過時忍棄東籬下  
看隨秋草衰

長安喜雪云千門萬戶雪花浮點點無聲落瓦溝  
全似玉塵消更積半成冰片結還流光含曉色清  
天苑輕逐微風透御樓平地已露盈尺潤年豐須  
荷富民侯

蘇郁

全唐詩話 卷三十一  
鸚鵡詞云莫把金籠閉鸚鵡個個分明解人語忽  
然更向君前語三十六宮愁幾許

和我詩云關月夜懸青塚鏡塞雲秋薄漢宮羅君  
王莫信和親策生得胡雛轉更多

郁貞元元和間詩人十二樓藏玉堞中鳳凰雙宿

碧芙蓉流霞淺酌誰同醉今夜笙歌第幾重

步虛詞

吟倚雨殘樹月收山下村

韋丹

丹字公明京兆人幼孤從外祖顏真卿元和中帥

江西功第一

丹與東林靈澈上人爲忘形之契丹嘗爲思歸絕  
句以寄澈云王事紛紛無暇日浮生冉冉只如雲  
已爲平子歸休計五老巖前必共閑澈奉酬詩曰  
年老身閒無外事麻衣草坐亦容身相逢盡道休  
官去林下何曾見一人

王播

王播少孤貧嘗客揚州惠照寺木蘭院隨僧齋餐  
 僧厭怠乃齋罷而後擊鐘後二紀播自重位出鎮  
 是邦因訪舊遊向之題者皆以碧紗幕其詩播繼  
 以二絕句曰三十年前此院遊木蘭花發院新修  
 如今再到經行處樹老無花僧白頭又上堂已了  
 各西東慚愧閣黎飯後鐘三十年來塵撲面而今  
 始得碧紗籠

出據  
言

周匡物

匡物字幾本潭州人元和十一年李逢吉下進士  
 及第時以歌詩著名家貧徒步應舉至錢塘乏餼  
 船之資久不得濟乃題詩公館云萬里茫茫天塹  
 遙秦皇底事不安橋錢塘江口無錢過又沮西陵  
 兩信潮郡牧見之乃罪津吏

劉言史

皮日休劉棗強碑文云歌詩之風蕩來久矣大抵  
 喪于南朝壞于陳叔寶然今之業是者苟不能求

古於建安卽江左矣苟不能求麗於江左卽南朝矣或過爲艷傷麗病者卽南朝之罪人也吾唐來有是業者言出天地外思出鬼神表讀之則神馳八極測之則心懷四溟磊磊落落真非世間語也自李太白百歲有是業者雕金篆玉牢奇籠怪百鍛爲字千鍊成句雖不追躡太白亦後來之佳作也其與李賀同時有劉棻強焉先生姓劉氏名言史不詳其鄉里有所歌詩千首其美麗恢贍白賀

外世莫得比王武俊之節制鎮冀也先生造之武俊雄健頗好詞藝一見先生遂加異敬將置之賓位先生辭免武俊善騎射載先生以貳乘逞其藝於野武俊先騎驚雙鴨起於蒲稗間武俊控弦不再發雙鴨聯斃於地武俊歡甚命先生曰某之伎如是先生之詞如是可謂文武之會矣何不一言以讚耶先生由是馬上草射鴨歌以示武俊議者以爲彌正平鸚鵡賦之類也武俊益重先生由是

全唐詩話 三十一  
奏請官先生詔授棗強令先生辭疾不就世重之  
曰劉棗強亦如范萊蕪之類焉故相國隴西公夷  
簡之節度漢南也少與先生遊且思相見命列將  
以襄之繇器千事賂武俊以請先生武俊許之先  
生由是爲漢南相府賓冠隴西公日與之爲飲宴  
具獻酬之儀歌詩大播於當時爲隴西公從事或  
曰以某下走之才誠不足污辱重地劉棗強至重  
必以公賓劉於幕吏之上何抑之如是公曰愚非

惜幕間一足地不容劉也然視其狀有不足稱者  
諸公視某與劉分豈有間哉然反爲之惜其壽耳  
後不得已問先生所欲爲先生曰司功掾甚間或  
可承闕相國由是掾之雖居官曹宴見與從事儀  
等後從事又曰劉棗強縱不容在賓署承乏於掾  
曹誦矣奚不疏整其秩相國不得已而表奏焉詔  
下之日先生不恙而卒相國哀之慟曰果然止掾  
曹然吾愛客葬之有加等墳去襄陽郭五里曰柳



子關後先生數十歲日休始以鄙文稱於襄陽襄陽邑人劉求高士也嘗述先生之道業嘗詠先生之歌詩且歎曰襄之人只知有浩然墓不知有先生墓恐百歲之後湮滅而無聞與荆棘凡骨溷吾子之文吾當刊焉日休幸存既撫實錄之何愧嗚呼先生之官卑不稱其德宜加私謚然棗強之號世已美矣故不加焉是爲劉棗強碑

劉猛

月生十五前日望光彩圓月滿十五後日畏光彩瘦不見夜光色一罇成暗酒匣中苔背鏡光短不照空不惜補明月慙無此良工

月生句

自念數年間

兩手中藏鈎於心且無恨他日爲我羞古老傳童歌連淫亦兵象夜夢戈甲鳴苦不願年長

苦雨句

朝

梳一把白夜淚千滴雨可耻垂拱時老作在家女

晚句

元微之酬劉猛見送詩如云神劍土不蝕異布火

不燒其推重如此

李餘

長安東門別立馬生白髮

句

霽後軒蓋繁南山瑞

烟發

句

嘗聞車馬繁土薄憂水聲

句

餘登長慶二年進士第蜀人也張籍送餘歸蜀詩  
云十年人詠好詩章今日成名出舉場歸去唯將  
新誥牒後來爭取舊衣裳山橋曉上蕉花暗水店  
晴看芒葉光鄉里親情相見日一時携酒上高堂

又賈島送餘往湖南云昔去候溫涼秋山滿蜀鄉  
今來從辟命春物變潯陽岳石挂海雪野楓堆渚  
檣若尋吾祖宅寂寞在瀟湘

李涉

題鶴林寺僧室云終日昏昏醉夢間忽聞春盡強  
登山因過竹院逢僧話又得浮生半日閒  
晚泊潤州聞角云孤城吹角水茫茫曲引邊聲怨  
思長驚起暮天沙上雁海門斜去兩三行

但將鐘鼓悅私慶肯以犬羊為國羞句尼父未適魯  
魯僕僕倦逃津徒懷教化心紆鬱不能伸一遇知  
已言萬方始喧喧至今百王則孰不挹其源句

劉昭禹

昭禹字休明婺州人也少師林寬為詩刻苦風雪  
詩云句向夜深得心從天外歸

嘗與人論詩曰五言如四十個賢人著一字如屠  
沽不得覓句者若掘得玉合子底必有蓋但精心

求之必獲其實在湖南累為宰後署天策府學士  
嚴州刺史卒于桂州幕中有詩三百首

孫昌胤

和司空曙劉慎虛九日送人云京邑歎離羣江樓  
喜遇君開筵當九日泛菊外浮雲朗詠山川霽酣  
歌物色曛君看酒中意未肯喪斯文

柳子厚與韋中立書云古者重冠禮將以責成人  
之道是聖人所尤用心者也數百年來人不復行

近有孫昌胤者獨發憤行之既成禮明日造朝到外廷薦笏言於卿士某子冠畢應之者咸憮然京兆尹鄭叔則怫然曳笏却立曰何預我耶廷中皆大笑天下不以非鄭尹而怪孫子何哉獨爲所不爲也

昌胤登天寶進士第

嚴休復

揚州唐昌觀玉蘂花拆有仙人遊悵然成一絕云

終日齋心禱玉宸  
魂銷目斷未逢真  
不如滿樹瓊瑤蘂  
笑對藏花洞裏人  
又羽車潛下玉龜山  
塵世何由覩舜顏  
惟有無情枝上雪  
好風吹綴綠雲鬟  
元和中見一女子  
從以二女冠三小僕  
直造花所佇立良久  
命小童折花數枝謂黃冠者曰  
曩有玉峰之期自是可以行矣  
行百步許遂不復見  
休復有詩元微之和云  
弄玉潛歸玉樹時  
不教青鳥出花枝  
的應未有諸人覺  
只恐嚴郎卜得知

樂天詩云羸女輸乘鳳下時洞中潛歇弄花枝不  
緣啼鳥春饒舌青瑣僊郎可得知

朱慶餘

慶餘遇水部郎中張籍知音索慶餘新舊篇擇留  
二十六章置之懷袖而推贊之時人以籍重名皆  
繕錄諷詠遂登科慶餘作閨意一篇以獻曰洞房  
昨夜停紅燭待曉堂前拜舅姑粧罷低聲問夫婿  
画眉深淺入時無籍酬之曰越女新粧出鏡心自  
知明豔更沉吟齊紈未足時人貴一曲菱歌敵萬  
金由是朱之詩名流於海內矣

又題王侯廢宅云古巷戟門誰舊宅早曾聞說屬  
官家更無新燕來巢屋唯有閒人去看花空廡欲  
摧塵滿櫪小池初涸草侵沙繁華事歇皆如此立  
馬踟躕到日斜

張籍送慶餘歸越云東隣歸路遠幾日到鄉中有  
寺山皆遍無家水不通湖聲蓮葉雨野氣稻苗風

全唐詩話 三十七  
州縣知名久爭邀與客同

楊虞卿

過小妓英英墓云凌晨騎馬出皇都聞說埋花在  
路隅別我已爲泉下土思君猶似掌中珠四絃品  
柱聲初絕三尺孤墳草已枯蘭質蕙心何所在焉  
知過者是狂夫樂天夢得皆有和章

樂天云人間有夢何曾入泉下無家豈是歸墳上  
少啼留取淚明年寒食更霑衣

夢得云但見好花皆易落從來尤物不長生鸞臺  
夜直衣衾冷雲雨無因入禁城

虞卿字師臯虢州人佞柔善諧麗宗閔僧孺相穆  
宗引爲右司郎中宗閔倚之時號黨魁爲京兆尹  
以罪貶虔州司戶叅軍死

楊汝士

唐名族重京官而輕外任汝士建節後詩云拋却  
弓刀上砌臺上方樓殿宰雲開山僧見我衣裳窄

知道新從戰地來又云而今老大騎官馬羞向關  
西道姓楊寶歷中楊於陵僕射入覲其子嗣復率  
兩榜門生迎於潼關宴新昌里第僕射與所執坐  
正寢嗣復領諸生翼兩序元白俱在賦詩席上汝  
士詩後成元白覽之失色詩曰隔座應須賜御屏  
盡將仙翰入高冥文章舊價留鸞掖桃李新陰在  
鯉庭再歲生徒陳賀宴一時良史盡傳馨當時疏  
廣雖云盛詎有茲筵醉醪醢其日大醉歸謂其子

弟曰吾今日壓倒元白

時爲刑侍

裴令公居守東洛夜宴半酣公索句元白有德色  
時公爲破題次至汝士曰昔日蘭亭無豔質此時  
金谷有高人白知不能加遽裂之曰笙歌鼎沸勿  
作冷淡生活元顧曰樂天所謂能全其名者也

張志和

漁父歌云西塞山前白鷺飛桃花流水鱖魚肥青  
箬笠綠簑衣斜風細雨不須歸又云釣臺漁父褐

為裘兩雨三三舴艋舟能縱棹慣乘流長江白浪  
 不曾憂又云雪溪灣裏釣魚翁舴艋為家西復東  
 江上雪浦邊風笑着荷衣不歎窮又云松江蟹舍  
 主人歡菰飯尊羹亦共餐楓葉落荻花乾醉宿漁  
 舟不覺寒又云青草湖中月正圓巴陵漁父棹歌  
 連釣車子掘頭船樂在風波不用仙

嚴維

維字正文越州人與劉長卿善長卿對酒寄維云

陋巷喜陽和衰顏對酒歌懶從華髮亂閒住白雲  
 多郡簡容垂釣家貧學弄梭門前七里瀨早晚子  
 陵過維答云蘇耽佐郡時近出白雲司藥補清羸  
 疾窓吟絕妙詞柳塘春水慢花塢夕陽遲欲識懷  
 君意朝朝訪檝師

時劉為睦州司馬

李播

播以郎中典蘄州有李生攜詩謁之播曰此吾未  
 第時行卷也李曰頃於京師書肆百錢得此游江



全唐詩話 四十  
淮間二十餘年欲幸見惠播遂與之因問何往曰  
江陵謁盧尚書播曰公又錯也盧是某親表李慚  
悚失次進曰誠若郎中之言與荆南表文一時乞  
取再拜而出

### 李德裕

元和十一年歲在丙申李逢吉下三十三人皆取  
寒素時有詩曰元和天子丙申年三十三人同得  
仙袍似爛銀文似錦相將白日上青天德裕頗爲

寒素開路及謫官南去或有詩曰八百孤寒齊下  
淚一時回首望崖州

出撫  
言

### 鄭還古

還古閒居東都將入京赴選柳當將軍者餞之酒  
酣以一詩贈柳氏之妓曰冶豔出神仙清聲勝管  
絃詞輕白紵曲歌遏碧雲天未擬生裴秀何如乞  
鄭玄不堪金谷水橫過墜樓前柳喜甚曰專俟榮  
命以此爲賀未幾還古除國子博士柳見除目卽

遺入京及嘉祥驛而還古物故乃放妓他適逸史  
載還古初娶柳氏女嘉會之初夢娶房氏後柳卒  
再娶東都李氏屬房直溫爲東洛少尹李之舅也  
禮宴皆房主之始知舊夢之前定也  
還古登元和進士第

裴休

贈黃蘗山僧希運詩曰自從大士傳心印額上圓  
珠七尺身挂錫十年棲蜀水浮杯今日渡江濱一

千龍象隨高步萬里香華結勝因擬欲事師爲弟  
子不知將法付何人休會昌中官于鐘陵請運至  
郡以所解一篇示之師不顧曰若形於紙墨何有  
吾宗休問其故曰上乘之印唯是一心更無別法  
心體一空萬緣俱寂如大日輪升於虛空其中照  
耀靜無纖埃證之者無新舊無淺深說之者不立  
義解不開戶牖直下便是動念卽垂其後休錄之  
爲傳心法要云

休字公美孟州人大中六年爲相能文章爲人醞籍進止雍閒宣宗曰休真儒者

薛宜僚

宜僚以左庶子充新羅冊贈使至青州悅一妓段東美賦詩曰阿母桃花方似錦王孫草色正如烟不須更向滄溟望惆悵歡情又一年到外國謂判官苗甲曰東美何故頻見夢中數日而卒櫬至青段奠之一慟而卒

九老會胡杲

九老會賦詩云閒居同會在三春大抵愚年最出羣霜鬢不嫌杯酒興白頭仍愛玉爐薰徘徊玩柳心猶健老大看花意却勤鑿落滿斟判酪酏香囊高挂任氤氳搜神得句題紅紙望景長吟對白雲今日交情何不替齊年同事聖明君

杲年八十九  
懷州司馬

吉皎

休官罷任已閑居林苑園亭興有餘對酒最宜花

藻發邀歡不厭柳條初低腰醉舞垂緋袖擊筋謳  
 歌任褐裾寧用管絃來合雜自親松竹且清虛飛  
 觥酒到須先酌賦詠詩成不住書借問商山賢四  
 皓不知此後更何如

皎衛尉卿致仕年八十八

劉真

垂絲今日幸同筵朱紫居身是大年賞景尚知心  
 未退吟詩猶覺力完全間庭飲酒當三月在席揮  
 毫象七賢山茗煮時秋霧碧玉杯斟處絲霞鮮臨

堦花笑如歌妓傍竹松聲當管絃雖未學窮生死

訣人間豈不是神仙

真前磁州刺史年八十七

鄭據

東洛幽閒日暮春邀歡多是白頭賓官班朱紫多  
 相似年紀高低次第勻聯句每言松竹意停杯多  
 說古今人更無外事來心肺空有清虛入思神醉  
 舞兩迴迎勸酒狂歌一曲會間身今朝何事偏情

重同作明時列任臣

據前龍武軍長史年八十五

盧貞

三春已盡洛陽宮  
 天氣初晴景象中  
 千朵嫩桃迎曉日  
 萬株垂柳逐和風  
 非論官位皆相似  
 及至年高亦共同  
 對酒歌聲猶覺妙  
 玩花詩思豈能窮  
 先時共作三朝貴  
 今日猶逢七老翁  
 但願醪醕常滿酌  
 烟霞萬里會應通

貞前侍御史內供奉官年八十三

張渾

幽亭春盡共為歡  
 印綬居身是大官  
 道跡豈勞登

遠岫垂絲何必坐  
 溪磻詩聯六韻猶  
 應易酒飲三杯未  
 覺難每況襟懷同  
 宴會共將心事比  
 波瀾風吹野柳懸  
 羅帶日照庭花落  
 綺紈此席不須鋪  
 錦帳斯筵堪作画  
 圖看

渾前永州刺史年七十七

白居易

七人五百八十四  
 拖紫紆朱垂白鬚  
 囊裏無金莫嗟歎  
 樽中有酒且歡娛  
 吟成六韻神還壯  
 飲到三杯氣尚麤  
 嵬峩狂歌教婢拍  
 婆娑醉舞遣孫扶  
 天

年高邁二疎傳人數多於四皓圖除却三山五天

竺人間此會且應無

居易刑部尚書致仕年七十四

樂天退居洛中作尚齒九老之會其序曰胡吉劉

鄭盧張等六賢皆多年壽余亦次焉於東都弊居

履道坊為尚齒之會七老相顧既醉且歡靜而思

之此會希有因各賦七言六韻詩一章以記之或

傳諸好事者時會昌五年三月二十四日樂天云

其年夏又有二老年貌絕倫同歸故鄉亦來斯會

續命書姓名年齒寫其形貌附于圖右與前七老

題為九老圖仍以一絕贈之云雪作鬚眉雲作衣

遼東華表暮雙歸當時一鶴猶希有何況今逢兩

令威

洛中遺老李元爽年一百三十六禪僧如滿年九十五歲

又云時祕書狄

兼謨河南尹盧貞以年未及七十雖與會而不及

列

全唐詩話卷之三

終



